


DISÜNGIDIIBWA MU KAABUJIMÀ

 Mvwa bu mupangè cyà dyamba mu dindà emu. Mvwa musòmbe paanyimà pààpa ne Mwanèètù Egan, ki mémè kuumvwa. . . Mwanèètù Neville ùvwa wàmba cintu kampànda, muntàngile. Ki mémè kwambila Mwanèètù Egan ne: “Ngùmbùikila mémè anyi?”

Ki yèyè ne: “Èyowà.”

2 Nènkù’s ki mémè ewu mubànde kaaba aka bwà kwamba cintu kampànda mu dindà emu. Mvwa ndyàmbidila, pâmvwà. . . . Dikàpàkapà dyàdya, kùdibo. . . didi dikòka dîyi, mbyenzè bu ne didi dîdikòka dîditùma pambèlu, paùdi wakula apu. Mbyenzè bu ne dikàpàkapà dyàdya didi dikòka dîyi dîditùma kwà pàtupù.

Mvwa ngumvwa menemene. . . bujaadiki pâmvwà mwômù amu bwà kusambidila mukàji uvwa ku tèlefonè awu. Kàdi ewu udi mupetè mukenji awu, mmupwè mwoyi bwà kufùnda cimenga cyà mwaba wà kubiikidila, kuumukila kùdi mukàji wa Ngàngàbukà Morrison. Nènkù nènswàmbe ànu cîndi mwenzè, bwà disambila dyènù bônso adi, ne dyànyi mémè. Mémè kutenteka byanza pa cikòlokolo, ne kufunkuna nombà, kwónso kùvwàye aku, ne kulòmba Nyumà Mwimpè bwà àye kùdi mukàji awu. Pa nànkù ndi ngeela meeji ne mMufwànyine kuumvwa aci ànu byà mwòmumwè ne mùdiYe mufwànyine kuumvwa bu twètù mwà. . . Nwamònu anyi? Ki mémè kucitèeka ànu panshi cyanàana. Ne mbifwànyine kwikala ne mshindù awu ngùvwà Mukalenge muciswè. Nwamònu anyi? Bìdi mwà kwikala bu ne mbifwànyine kwikala bîmpè nànkù awu.

3 Ki díbà adi dîngùmvù majaadiki pâmvwà nsanganyiibwamù apu, a muntu kampànda wàmba ne Mwanèètù wa bakàji Rook ùvwa ne. . . Ngeela meeji ne Mwanèètù Neville mmwambè ne yèyè ùvwa mu—mujimije lungènyi, bu nànkù. Tùshaalàayi bakwàte Nzambì bwà cyòci aci, biikàle ànu tuvùluka cintu cimwèpelè eci ne: Nzambì mmumanyè Bèndè Yèyè. Yèyè mmumanyè byónso bìdi bibàtangila.

4 Nudikù mwà kuumvwa bîmpè lwà mu ndekeelu mwàmwa anyi? Pawikalà kùyi mwà kuumvwa bîmpè to, kùdi myabà munda mutupù kaaba aka. Udi mwà kushintulula mwaba pawikalà muswè. Nènkù, twànji bi kumòna, eci ki cikòlokolo cyà mushinga anyi? [Mwanèètù wa balùme kampànda ùdi wàmba ne: “To, mukalenge.”—Muf.] Eci cidì *apa* eci ki cikòlokolo cyà mushinga anyi? Èyo. Nètùmonè ní tudikù mwà kutàmba kuciseemeja ndambù. Kàdi bwà apa nùnkù, Gene? Nebiikalè ànu bîmpè. Ne misangu mikwàbò ntu mpàta dîyi ndambù; ndi muiyishè bikolè be matuku aa. Mbîmpè nànkù anyi? Nudikù mwà kuumvwa bîmpè nànkù anyi?

⁵ Ne ncyà bushùwà ne tudi tuvùlùka aba nùnkù mu disambila. Ne tudi baswè kufila mulubù wà masangisha a butùmbi mwàmwa mu . . .

Ùndì mutàngile ewu m’Mwanèètù wa bakàjì Rook anyì? Mvwa ngeela meeji ne mvwa mutàngile inàbànzà kampànda udi paanyimà apa udi mufwànàngàne nendè. Mvwa ndyàmbedila ne: “Ncyà bushùwà ne ncyèna munkaci mwà kwamba bintu byà lukutukutu kaaba aka to.” Ndi ntàngila muntu mufwànàngàne nendè, lwà paanyimà pààpa. Yèyè ùdi mu Lùpitàadi lwà Saint Edward.

⁶ Ne pa nànkù, ku Cleveland, mu Tennessee, kàbidì ne mu Californie, tuvwa benzè masangisha a butùmbi. Mukalenge ùvwa mubènèshe bikolè, ne bintu byàbùngi bìvwàYe mwenzè. Nènku tudi ne disànkà bwà cyòci aci. Tudi ne disànkà mutùdi mwà kwikala baalùkile kù balundà batùtù naabò, tuufila mulubù wà bwakàne ne luse lwà Nzambì. Mùshindù awu ngwàkènzàbo mu Bible.

⁷ Mvwa ngaanyisha Mwanèètù Neville, anyì disambila dyà Mwanèètù Beeler, mùvwàye musambidile bantu, ne—ne ùlòmba dikwàcisha ne luse. Ne bu twètù ànu mwà kutàngila munda mwà matùkù, nudi misangu yònsò, byònsò bìdi byènzekà, nenùsanganè ne kùdi cintu cishùwashùshàle cyà menemene pa bwalu abu. Kàdi pashùshe pààlu Mwanèètù Neville kutwàla balami aba, ne bikwàbò, ku cibumbà cyà ku cyambilu eku, bwà—bwà kwamba mabènèsha a Nzambì pa nu—mulàmbù wà èkèleeziyà, mèmè kuumvwa mùvwàye wàkula mu disambila dyèndè kùdi Nzambì, pa bìdi bitàngilà bantu abu, mùvwàbo bàsambidilangana muntu bwà mukwèndè. Ne aci cidi cingenza bimpè bwà kuumvwa mpaasàtà udi mwà kusambidila balami bèndè, ne balami bàsambidila pààbò mpaasàtà. Panùdi numòna èkèleeziyà ùbwela mu dikwàcishangana dyà mu mudimu mùshindù awu, èè, cintu kampànda cidi pabwìpi ne kwenzeka. Ki mùdibi bikèngela bwà èkèleeziyà kwikalayè mu bulongàme. Ne cidi cimpèèsha ànu cingènyingenyi bwà cyena-bwalu kampànda’s. Nkààvwa muswè kwakula pa dibènèsha dyà ku Kaadèsà, ne dibènga dyà kutèèleja mulubù wà batentekedi, kàdi dībà adi mèmè kushintulula mmwènenu, kuya ku cintu kampànda cikwàbò dībà adi.

⁸ Nènku mpindyewu, bwà dyondopiibwa, ndi ànu ne kaabujaadiki kakesè kàndi njinga kufila. Mvwa ntèkemena ne nèmmonè mwanàanyì wa balume, Billy, paanyimà pààpa, kàdi yèyè ùdi naakù mu mpaayà.

Ne Billy’s ùkaadi wènda ùlengelakù mu masangisha, kutàmba mùvwàye kale wàwa. Ùvwa ùbìnduluka, ùlùnduka, ne ùvwa mwà kwambila bantu ne: “Kaa, ndà kasòmbà panshì! Ndà kasòmbà panshì!” Wàmba ne: “Mèmè’s nènkupeèshè kartà kàà disambila.” Kàdi ngàmònu, àbidì àdi panshì aa, kùkaadi

bantu mu masangisha bàdiye ùtamba kuumvwila luse. Yèyè kàyì mushààle ne twartà twà disambila to, díbà adi neàbàtèèkè mu cibambalu kampàndà bwà ngaamòna mwà kuya kabàsambidila.

⁹ Ne cintu bu nàнку ncyenzèke mu Chicago, musangu mushààle ewu. Nènku ndi muswè kubala mukàndà awu yèyè mulwè cyà bushùwà. Ncìvwakù ne mùshindù wà kumumòna to. Kàvwa mumanyè ne mvwa ndwa mu dindà emu to, àpa nùнку, ne—ne ndi dijinga—dijinga ne mukàndà awu to. Kàdi ngáfumu ku dikwèlela meeji pàngèdi meeji bwà mabèèdi bùngiwù apa. Nènku mùshindù wùdibi ngwòwò ewu. Mukàndà mutwà byàlà wùdi . . .

Mvwa mbala mu cibèjibeji, (To; mbandondèle) ne mwaba wùvwà bibèjibeji bidyula Oral Roberts, bwà mùvwàye musambidile mukàji kampànda uvwa ne disaamà dyà nsùkaadi kàdi mufwè. Kàdi mèmè, mpindyewu, bu mwena Àmèrikè, ntu—ntu muswè kutèèleja mikenji ne—ne muntu udi mu bukòokeshi awu. Kàdi ndi ngeela meeji ne aci kì ncijaalàme to. Ndi ndìkonka nì mbafwànyineku kwanyisha bwà kufùnda, mu cibèjibeji, bònsò bàkaadiku Oral Roberts musambidile ne bondòpiibwe, bàvwa bangàngàbukà balekèle abu. Ndi ndìkonka's, bu bòbò mwà kucìshintakaja musangu wùmwè, nwamònu's. Kì mbafwànyine kwenza aci to. Ne díbà adi ndi ndyàmbidila pàmwàpa ne dyabùlù mmubèlè mu cibwejàkàji, mu mùshindù wà ne, kabidi Nzambi ùmwanyishila, bwà mu Ditùkù dyà Cilumbulwidi kwikalabò ne cyà kulumbulula bwà bwalu abu. Kàdi ndi mumanyèku binunu byà bantu bàtù Oral Roberts musambidile, bàkaavwà bàpunga ne lufù, kàdi biikàle ne balwè mubidi tumatuma.

¹⁰ Pa nàнку, nudi numòna's, bòbò, bàdi bènza kànsungànsungà pa bwalu abu. Nebàtangalajè lwàbò luseke, luseke lwà didyulangana alu, kàdi kabààkutangalajakù lukwàbò luseke alu to. Mpindyewu, bùdi cibèjibeji naabu mbwà kwikalabà citàbeeja bantu pa maalu a bwàcyà-bwilà àdi ènzeka. Díbà adi mèmè ndi ngeela meeji ne, bantu bòbò bàdìtácishakù muntu bwà mukwèndè, pàdi muntu wòndopiibwa, mwondòpiibwe cyà bushùwà, bìvwa bikèngela bwà cibèjibeji cyònsò mu Ètat-Unis kupàtulaci kaabwalu aku. Kàdi kabèèna mwà kucyènza to nànsha byà ubàfuta. To. Wèwè mubàtwàdila cintu cyà mùshindù awu, s' bàdi bàkenya ku mènù bàcìseka, ne bàcibènga. Kàdi mpindyewu kwòkò cintu cyà didyula . . . Bìdi ànu bileeja ne ditunga edì dikaadi pabwipi ne cilumbulwidi. Cyà bushùwà. Ne bìdi bìkèngela bwà kwikalè cilumbulwidi, ne kakwèna mùshindù wà kupàndukakù to. Ne bòbò bàdi ànu bàdyùngwijila mudilu pa mitù yàbò, ne bikwàbò. Ne bìinè abi—abi. . . badìtápùlùle, ne mèyi-makùlù! Cibèjibeji, mèyi àci makùlù, mbwà—mbwà kumanyisha bantu cyònsò cidì cìmpè anyì cibì, cidì cyènzekà. Kàdi bòbò bàdi kule ne mèyi àbò makùlù. Ne pàdibo kule ne mèyi-makùlù àbò, díbà adi kabàà—kabààkukùmbaja kiipàcilà kààbò bìmpè nànsha.

11 Nènku mùshindù wùmwèwùmwè awu ngùdibi ne èkèleeziyà. Pàdi èkèleeziyà kule ne méyi èndè makùlù, kénàku mwà kukwàcila bansantu mudimu bîmpè nànsha. Bikèngela tùshaalè pàmwè, bikèngela twikalè badyènzè cimùkù. Bikèngela twikalè mwoyi wùmwè ne díyi dímwè. Bwà cyanaàna, katwàdyàkukwàcilakù Nzambi anyi bantu mudimu to, ànu twètù ne mwoyi wùmwè ne díyi dímwè, bwà kutwà nyama ku mikòlò méyi-makùlù a Bible ne bintu bìdi Nzambi mwambè ne mbyà cyà bushùwà abi. Tudi misangu yònsò ànu ne cyà kubítwa nyama ku mikòlò.

12 Billy ùvwa mushààle mu cibambalu amu, mu Chicago, yèyè. . . Muntu kampànda ùvwa mulwè kùdiye, mukàji mwikàle ne bàyendè, ne kànsèrè ku bisùlùsùlù, ùpunga ne lufù. Ne mukàjèndè ùvwa mukwàta kùdi disaamà dyà tunèkè mwikàle mu dikalù dyà balèma, kàdi mukàji awu ùteeta kutàngila bwalu bwà muntu uvwa utàta nànsha mwà kujuukila kuulu pàtupù, mwikàle ne kànsèrè ku bisùlùsùlù. Ki Billy kumwambilayè, kwamba ne: “Mfwi—mfwilèku luse, mukalenge.” Yèyè ne: “Ne disànkà dyònsò mwva mwà kukupèèsha kartà kàà disambila.” Ki yèyè ne: “Kàdi kî—kî nkunshààdilekù nànsha kàmwè to.”

13 Ki awu ne: “Èè, èyo, mwanàanyi wa balùme.” Yèyè ne: “Bidi ànu bîmpè.” Yèyè ne: “Tudi baditácishe bwà kufika kaaba aka, kàdi nyawù kabiyikù bipeepèle bwètù twètù.”

14 Billy kwambayè ne: “Nènkwbabilè ciwènza.” Yèyè ne: “Nyààya kangata papa. Ne nèm bwelè nendè, ne nèm patukè nendè.” Ki yèyè ne: “Pàngènzà nànkù, panùdi ànu nutèèleja Diyiiisha dyèndè,” yèyè ne, “dìbà adi udi wangata webè. . . anyi mukàjèèbè ne wèwè, ne nenù bwelè mu kaacibambalu kakesè mündi mpicila amu, nènku nèm mwambilè bwà kunisambidilayè.”

15 “Kaa,” mwàkambà awu nànkù, “aci’s ncyà lulamatu’s, mwanàanyi wa balùme. Aci ncìmpèku’s.” Nwamònu anyi? Ki—ki cilunji ncyòci aci. Nwamònu anyi? “Bìmpèku’s. S’mbbìmpè.” Nwamònu anyi?

16 Nènku dilòòlò adi, Billy, pàakaalukilàye kuntwaku, mucikàle anu ùbèngangana ne cyònsò cìvwàye mwambè aci, cyà ne ùvwa ne bukwendè bwèndè mulùme kuntwaku uvwa uzònzà mashi ku disaamà dyà mashi àzòloloka mu bisùlùsùlù awu. Ne bukwendè bwèndè wa bakàji kuntwaku, uvwa ne cìfù cìzòloloka mashi, bwà byújà, kàbìdi ne bàvwa balwè pàmwè naabò, mwenzè bu bwà kubàkwàchisha bwà kubwelabò. Bikèngela nùtabalè, nkufwànyine kwikala cibambalu cijimà cyùle tètè, nudi numòna’s. Kàdi bamanè kupicilamù ne babàsambidìle, twètù kupeta mukàndà wà dyandamuna, ku poste ne, muntu awu wàkondopiibwa ànu menemene ku kànsèrè kàà bisùlùsùlù aku. Mukàji awu, mukàjèndè uvwa mu dikalù dyà balèma awu, mmujuukile kuulu, wènda wèndakana ànu

mwèndè ne kale mùvwàye kwònsò aku amu. Mulùme uvwa ne mashi àzòlologa mu—mu bisùlùsulù awu, bifùmine ku disaamà dya cyàdi, s'ùkaadi ne mubidi tumatuma. Ne mukàjèndè awu mmwondòpiibwe ku byùjà abi. Bànaayi bajimà bondòpiibwe, dyàkàmwè! Ndi ndikonka bibejibeji ní mbifwànyinekù kwikala ne budiswilè bwà kufùnda ciinè aci. Nwamònu anyi? Nwamònu anyi? Nwamònu anyi? Kaa! Kàdi Nzambì ùcidi ànu Nzambì. Ùdi wènzà maalu ànu mu mùshindù Wèndè Yèyè mwinè, nudi bamanyè's, ne Yèyè mmwimpè be. Tudi ne disànkà dyàbùngi dyà kumanya ne Yèyè ùdi Nzambì.

17 Tuvwa twakula dindà adi bwà muyiishi kampànda mutekète utùtù bamanyè, uvwa kale wàwa ùya myaba yònsò, wènda ùsambidila babèèdi ne bikwàbò byònsò. Ki kuyayè kasambidila muntu kampànda mu lùpitaadi mu Louisville, bwà disaamà dyà cyàdi, inàbànzà awu kufwàye. Kalùmyàna aku kwambakù ne: “Èè, kabyena ne mushinga. . . Nzambì kèna. . . Nzambì kàtukù to. Yèyè nùnkù's mmushààle mukwàte ku Dìyi Dyèndè.” Yèyè ne: “Ndi mumulaabè maanyi ànu mùdi—mùdi Bible mwambè. Yèyè kàyì mushààle mukwàte ku Dìyi Dyèndè to, Kèna Nzambì to.” Yèyè ne: “Cidi ànu mmukànda nàka.”

18 Mpindyewu, aci ncifwànyine kumwèka cilelèlè bu wèwè kùyì mumanyè Nzambì. Aci ncutùpà cyà Mifùndu, kàdi kí m'Mifùndu yònsò nànsha. Mbilondèshile diitabuujà dyà muntu yèyè mwinè. Nwamònu anyi?

19 Ki mèmè kwambila mukàjàànyì, kwamba ne: “Nkwenzèkènzèke bintu bùngi cyanààna, bindi ànu mumanyè ne bidikù. Ncyèna mumanyè cìikalà mwà kungenzekela mèmè ku ndekeelu to. Ndi mwà kulonda njila umwèumwè awu. Nzambì Yèyè ànu muumùshe cyanza Cyèndè cyà luse kùndi, s'nèndondè njila umwèumwè awu. Kàdi Yèyè ànu mucikàle mulamè cyanza Cyèndè cyà luse ne cyà bulombodi pambidi pàànyì, nèntungunukè ànu kutùngunuka.” Kàdi mèmè kukonka Meda, kwamba ne: “Nganyì uvwa mu cibambalu amu dindà adi paanyimà pàà mèmè mumanè kumòna cikèèna-kumòna cyà mwanàànyì mukesè wa bakàji, Sharon?”

20 Byòbì biinè, ditùkù adi, s'mvwa mwambè kuuminyina's. Mvwa musòmbe mu mùsèèsù. Cibì nudi bamanyè bwalu-bulonda bwànyì bwà cikèèna-kumòna cyèndè, pashiishe. Ki mèmè kutàngila, ku luseke lwànyì aku, kulwakù nsongàakàji wa citende wènda ùpweka ne mùsèèsù mu Jeffersonville emu, ùvwa menemene ànu bu cikèèna-kumòna aci. Byàkakèngela bwà nshaalè mudikwàte byanza pàmwè. Ùvwa mufwànàngàne bikolè menemene ne cikèèna-kumòna cyà Sharon wanyì mutekète awu aci! Ùvwa nsongàakàji dìbà adi.

21 Nènku paanyimà pàà cikèèna-kumòna aci mu dindà adi, pàvwà mu Butùmbi, mèmè. . . Hope ùvwa ùngambila, mwikàle mungeelè dibòkò kunshìngù, wàmba ne: “Kwikadi uditàcisha

bwètù twètù to, Bill. Twètù tudi bímpè bitàmbè.” Mvwa ànu nkèba bwà kudishebeya. Ki yèyè ne: “Kuditàcishi to. Ndayèku ne kwàkuditàcisha kàbìdì to.”

²² Ki mèmè ne: “Ncyèna mwà kucilaya to, Hope, bwalu ndi—ndi—ndi. . . ndi nditàcisha mu meeji. Ncyèna mwà kupanga kuditàcisha to.”

²³ Ki mèmè kupàtuka mu cikèènà-kumòna aci, mwimàne mu cibambalu mu m̀dimà. Kàdi kaciyi cikèènà-kumòna to, kaciyi didifwànyikijila to, kàdi dibòkò dyèndè dicivwa ànu dingeela. Ne ùvwa ùntuuta cyanza. Mèmè kudyàmbidila ne: “Anjì indilà kakesè. Eci kî. . .” Ncivwa mumanyè cyà kucibiikila mu matùkù awu to, cikèènà-kumòna. Mvwa ncibiikila ne ndibwela dyà mu nyumà. Mèmè kwamba ne: “Eci cidi. . . Cyanza cyèndè’s ncyeci cìcidipù.” Mèmè ne: “Udi kaaba aka anyi, Hope?”

²⁴ Yèyè ne: “Bill, ndayèku ne kwàkuditàcisha kàbìdì bwànyì mèmè ne Sharon to.” Bwalu, nkààvwa mushiikile. Nkààvwa pabwìpì ne kudishebeya.

Mèmè ne: “Ndi nkulaya nànkù.” Ki yèyè kunguupukila, ne kuntuutayè cyanza.

Ki pashiishe mèmè—mèmè kwamba ne: “Hope, udi penyì?” Mèmè kupeta. . . kubaabata, too ne m̀ngààkalwà kukwàta kaam̀nyòòlòlò kàà mwèndù wà nzembu ne kukàkòka. Mèmè kwenda nỳnguluka, kukenketa mu nkwasà ne nkwasà yònsò, bwà kumòna ní ùvwa musòmbemù.

Yèyè ùdi Nzambì. Ùdi Nzambì, leelù ewu, ànu mùvwàYe pa Mukùnà wà Dik̀dimuka dyà mpàla pààkamwènekà Mòsà ne Eliyà apu. Yèyè ùcidi ànu Nzambì.

²⁵ Tudi mwà kupicila mu ntàtù yàb̀ngì ne mateeta. V̀lukààyi ànu ne, k̀di Kampànda Udi mumanyè, ùkenkesha njila, ùcivwija cilelèlè. Ncyèna mumanyè cidi paanyimà pàà ridò to. Kàdi ndi mumanyè cintu cìmwèpelè ne, ndi nkolesha mutàngile ku kiipàcìlà kàà dibìikila ditùmbùke, ditùkù dyònsò, nditàcisha bwà kwikala ne mwoyi bwà bwalu bunènè bwikalà mwà kwenzeka d̀ngà ditùkù d̀ngààMumòna, mpàla ne mpàla, ne ndonda bwalu ebu ne: “Mus̀ngila ku ngàsà.” Ndi ne mwoyi mbwà ditùkù adi. Nshiya bintu abi paanyimà, bìdiku abi, ndi muswè kukolesha, nt̀ngunuka ànu ne kuya.

²⁶ Ndi muswè bwà tabernacle ewu, mpindyewu uǹdì biimànyine kuulu ewu, ndi muswè bwà ǹkoleshè batàngile ku kiipàcìlà kàà dibìikila ditùmbùke. Cyònsò ciǹdì nwenza, ǹdiswikè cimùkù, ǹwikale ne nyumà wa bwena muntu ne mwènù mwònsò, kàdi misangu yònsò ànu ne dibòko dyolola, bwà kwolola cyanza ne kupetakù muntù mukwàbò, bwà kumubweja. Kàdi mu Diitabuujà dit̀dì mpindyewu tuyiisha ne tulwangeena mvità ne mwètù mwònsò edi, kaǹsemenyikù kule naaDì ntàntà wa centimètre nànsa umwe to. Bwalu, nwènù nungitabuujà ne ndi musadidi Wendè, eci ki ndongamu wa

Nzambì. Kacyàkwikalakù mu ciibûngì to. Neciikalè misangu yònsò ànu mu banyaàbanya, ki citùku misangu yònsò ne ciikalàku misangu yònsò. Kàdi, vùlukàayi ne, bàakafùnda ne: “Kanùciinyi to, nwènù kasumbù kakesè kàà mikòòkò; ndiswà dîmpè dya Taatù wenù bwà kunùpèèsha Bukalenge.”

²⁷ Mpindyewu, kùdi kasumbù kàà midimu kàà èkèleeziyà wetù, balami, balubuludi, mutàngidi wa kàlaasà kàà Dyàlumingu, bàmpaasàtà, mùdi èkèleeziyà wetù mutèèkiibwe mu bulongàme. Nènku nwènù, cisàmbà, mbàdi basungùle beena midimu eyi ne mpaasàtà ewu. Mémè ndi ànu mutàngidi mukùlù cyanààna, bwà kumòna ní bìdi byènda bìmpè, ne bwà kufila mibelu ne bikwàbò. Nwènù mbàdi bàsungulà mpaasàtà wenù, nudi nusungula balubuludi bèènù, nudi nusungula balami bèènù, nudi nusungula mudimu wònsò wùdiku mu èkèleeziyà ewu; nwènù, cisàmbà. Ne mmudimu wènù wà kutwà bantu abu nyama ku mikòlò, nwamònu's, bwalu nebènzè bilèma. Mbàà cifwàkà pàdìbo apu. Bàdi ànu bantu bèètù aba, ne nebènzè bilèma. Kàdi Mfùmù wa ditùngà dya Ètats-Unis yèyè mwenzè cilèma, tudi tumwipata, bu Mfùmù wa ditùnga anyi? S'tudi tucipwa mwoyi ne tutùngunuka. Mùshindù awu ki wutudi baswè kwenza ne èkèleeziyà wetù mpindyewu. Mvwa mumutèlèje ùsambila, mu tusunsa tukesè emu, ùsambidila balami abu. Ne kuumvwa paanyimà pàapa, bujaadiki, ku ciibi, bwà kùdi balubuludi, munùdi bònsò ne dīyì dīmwe. Mpindyewu shààlaayi mùshindù awu. Mpindyewu, nwènù bidimba nùtwayi balubuludi aba nyama ku mikòlò, balami, ne mpaasàtà. Ne vùlukàayi ne, panùdi nushàala badisangè mùshindù ewu, vùlukàayi ne cidi mmudimu wà dyabulù bwà kwenza ne cikosolokè. Mpindyewu ki citùku misangu yònsò ne ki ciikalàku misangu yònsò. Kàdi nùtwayi beena midimu yènù abu nyama ku mikòlò, ne cyòci aci ki muyiiki wùmvwà muswè kwenza.

²⁸ Ne pashìshe ndi kàbìdi kaaba aka ne ndambù wà... cintu kampànda bwà mboodi wa mamanyisha mu dindà emu, pa bìdi bitàngilà cisangilu cyà tusumbù atu ne bukòkeshi bwàtù. Ne neciikalè ku mboodi wa mamanyisha. Ne ndi ne dibèji bwà Mwanèètù Roberson, yèyè udi mulombodi wa... wa balubuludi. Ne pashìshe ndi ne dibèji bwà Mwanèètù Collins, ngeela meeji, udi ukwàta mudimu bu mulombodi wa kasumbù kàà balami. Nènku mpindyewu, midimu yònsò eyi mmitèèkiibwe bilondèshile Mifùndu, ne yidi ne cyà kwikala ne tunungu twà mu Mifùndù twà cidiyi ne cyà kwenza. Ki bwà cinyi, balubuludi bàdi ne mudimu wàbò sungasunga. Ne balami bàdi ne mudimu wàbò sungasunga. Mulombodi wa kàlaasà kàà Dyàlumingu ùdi ne mudimu wèndè yèyè sungasunga. Ne mpaasàtà ùdi mfùmù wa cisumbù cyà mikòòkò.

²⁹ Mpindyewu, yònsò wa ku yòyì eyi mmyelàngàne mabòko. Kàdi ndi ngeela meeji ne cisangilu cyènù kabivwa ne cyà kwikala cyà nwènù bònsò pàmwe to, kàdi civwa ne cyà kwikala cyà

kasumbù ne kasumbù pabwàkù, bwalu balami kabèèna ne cintu nànsha cimwè cyà dyambila balubuludi to ambà ànu bôbò ne bwalu bwà kubàleeja. Ne aba pààbò, balubuludi bàdi bàtàngila maalu a mpetu ne bintu byà diibaka naabi; kabèèna ne bwalu ne balami to. Balami mbampùlushi bàà èkèleeziyà, ne bambulwishi bàà mpaasàtà. Kàdi balubuludi mbàdi balamè bintu byònsò. Balubuludi kabèèna ne cyà dyenza ne luseke lwàbi lwà nyumà to, ne mulami kèna ne cyà dyenza nànsha cimwè ne luseke lwàbi lwà mpetu to. Ki bwà cinyi, cidì ne cyà kwikala nànkù. Ne mutàngidi wa kàlaasà kàà Dyàlumingu ùdi kumutù kwà kàlaasà kèndè kàà Dyàlumingu aku. Nènku ndi naabi bifùnda byònsò, bituuta ku cyamù, bwà kwikalabi ku mboodi wa mamanyisha.

³⁰ Ne pashiishe netwikalè kabìdi mwà kwela, mu kâdrè, Diilongesha didì èkèleeziyà ùtwa nyama ku mikòlò, ne kuDyèla mu kâdrè emu, mu èkèleeziyà emu; citùdi tutwà nyama ku mikòlò aci, mèyì—mèyì makùlù, Dilongesha dyà èkèleeziyà. Mpindyewu, bwà kwikala èkèleeziyà, bikèngela twikalè ne dilongesha.

³¹ Katwèna tujiiika makunji kampànda, twamba ne: “Tudi tuya ànu too ne *apa*” to. Tuyààya ànu kule, mu bwobùmwe ne bantu bònsò ne, kwikalà Nzambi mutùpe mùshindù wà kuya aku, mu Mifùndù Yèndè, pàmwe ne bantu. Nènku mpindyewu shàalaayi badyènzè cimùku, biikàle ne dìyì òmwè, ne mwoyi wùmwe, ne nuya kumpàlà bwà Nzambi. Mùshindù awu ngùdi Nzambi muswè bwà twètù kwenza.

Mpindyewu túsambilàayi, ne pashiishe tùbululàayi Dìyì.

³² Éyì Mukalenge wa mushinga mukolè, tukàadi mpindyewu pa kulenga Dìyì dyà Nzambi, anyi kubala kwà Dìyì edi. Swàku bwà Nyumà Mwimpè Webè àtúmvwijè bitùdi naabi dijinga. Ne twàkulèku, Mukalenge, ne twènzè maalu ne twikalè ne mwoyi, bamanyè ne tudì bònsò bânà Bèèbè, ku ngàsà, mùdi Wèwè mutùbiikile amu. Kwikalèku bwobùmwe mu èkèleeziyà emu, bu mùdìbi ne tukàadi ànu pa kubwela mu nkwaka kampànda munène, mutùdi tuumvwa, wa dijuula dyà bakwàbò bambi bwà kuyabò kabwela mu madimi a bwambi kùdi ne, bu Wèwè mwà kuntuma mu bitùpà bishùlèshùlàngànè byà buloba, bwà kuya kakwìmanyika Diitabuuja, ne kwikala ne kwambi mudilongòlòle ne mudìswìle, ne mulongesha bwà mwangacila apu. Ne swàku bwà Diitabuuja dyàkapèeshàbo bansantu musangu wùmwe, ditùdi twètù tutwà nyama ku mikòlò ne dikima dyònsò adi, diikalèku cijèngù cyela pa buloba bujimà. Enzàku nànkù, Mukalenge. Swàku bwà mushikì mukesè wà bisoosà bibi ewu, mùvwàbi mu ditùkù ditwàkawùlambulà Kùdi amu, swàku bwà kwikalè èkèleeziyà kampànda mujuula kaaba aka, Mukalenge, bwà mwòmò emu mwàpàtuka bambi ne batangadiki ne balongeshi ne bampandanjila, bàyà ku bitùpà byònsò byà buloba.

³³ Tudi baswè kulòmba, mu dindà emu, dibènesha dyà pabwàdi bwà Mwanèètù wa balùme ne Mwanèètù wa bakàji Stricker bàdi bàsaamà mpindyewu aba. Kàdi tudi twètù bamanyè ne tudi bônso beela ku mateeta aa. Mwànà wa balùme yónsò udi ulwa kùdi Nzambi ùdi ne cyà kunyookibwa, kupimiibwa. Kàdi twètù tulekela ànu bipeepèle, ne twalukila, dîbà adi tudi bânà bàà mu masandi, katùyi bânà bàà Nzambi to. Pèeshakù Mwanèètù wa balùme ne Mwanèètù wa bakàji Stricker dikàndà ne bukolè, bwà kusùminyinabò ku mwaba wàbò wà mudimu. Byòbi bikèngela bwà kwikalabò bàlòmbangana byàkudyà bìdibo bàdya, cyanza Cyèbè cyà dibènesha ciikalèku pambidi pàabò. Bwalu tudi bamanyè ne ncifwànyine ànu kwikala ku didyènzeja mene adi kùdi Wèwè mufwànyinekù kuleeja mwena kalaba wa mu Àfrikè cìdi mwena Kilistò wa cyà bushùwà. Enzàku nàнку, Mukalenge. Mpindyewu byònsò byènzekèku bilondèshìle diswa Dyèbè.

³⁴ Bènesàku mpaasàtà ewu, Mwanèètù Neville. Tudi tulòmba, Mukalenge, bwà Wàmuvwijakù mulami wa mìkòòkò, mÚvwà naabò kale wàwa amu. Ne katwèna baswè kupwà mwoyi mukàjèndè mukesè mulenga, udi usaama bikolè awu to. Mwena lukunà awu mmuswè kushiya Mwanèètù Neville ne cisumbù cyà bânà aci, kabàyi ne maamù to, kàdi tudi twimana ne tutèeka, ku diitabuuja, Mashi a Yesù Kilistò pankaci pàà mwena lukunà awu ne mwanèètù wa bakàji. Swàku bwà Nyumà Webè, Mukalenge, ikalè munène pambidi pèndè, bu mùdibi ne bakàji bônso mbalongolola bwà kupweka kupicilabò mu cibandabanda eci, cyà mìdimà yà cikondo eci, kàdi tudi tulòmba bwà Wikalèku nendè. Bènesàku bânà bakesè abu. Yèyè neikalè mubindùlùke mpindyewu, ne ùlubakana, kàdi swàku bwà Nyumà Mwimpè ikalè ku ciibi cyà luse, mèbà ònsò, bwà dîkù adi.

³⁵ Bènesàku kasumbù kèètù kàà balombodi, Mwanèètù Wood, ne Mwanèètù Egan, Mwanèètù Roberson, ne bakwàbò bônso abu, Mukalenge. Balami, balubuludi, ne bônso bàdi bakwàcishi bàà mu èkèleeziyà abu, tudi tulòmba, Mukalenge, bwà Wèwè kubàlekelakù bakwàta mudimu mu cipungu cyàbò ne cijila ne—ne bwakàne. Bèneshakù, Mukalenge, aba bàkaadi bakwàte mudimu mu bikondo bishààle ebi. Ne tudi tulòmba bwà Wèwè kutùngunuka ne kwikala neetù bônso, bwà twamònakù mwà kumanyika bu èkèleeziyà wa bwobùmwe, ne Nyumà ne dinanga dyà Mukalenge. Tudi tulòmba mpindyewu bwà Wèwè kutwàbanyinakù Dîyi, bilondèshìle mutùdi ne lukengelu, patùdi tubala mu Dîyi Dyèbè difùnda apa. Bwalu tudi tulòmba nunku mu Dìnà dyà Yesù. Amen.

³⁶ Nènku mu kusambila, mvwa ngeela meeji patùvwà tubènesha anyi tulòmba mabènesha bwà kèètù kàà cyena-leelù. . . kasumbù kèètù kapyakàpyà kàà balubuludi ne bikwàbò apu, mvwa ngeela meeji kùdi Mwanèètù Fleeman ne Mwanèètù Deitzman ne aba bàdi basòmbe kaaba aka, bàtu bakwàte mudimu bimpè abu, kacya kwònsò aku. Nènku tudi baswè

kwikala ne kusàkidila kùdi Nzambi bwà mudimu wàbò wà lulamatu awu. Mukalenge ikalèku ànu naabò, bwà kubàbènesha ne kubàkwàcisha. Ndi muswè kubala kumpalà kwà... Nwikalàayi ànu bavùlùke mpindyewu, mboodi wa mamanyisha ne bikwàbò, ne masangisha ikalà mwà kulwa.

³⁷ Nènku tudi ne disànkà dyà kwikalakù neetù, mu dindà emu...Èè, ndi mufwànyine kucyàmba mùshindù ewu ne, muntu uvwakù wa musinga mukolè kùndi, mu bikondo bishàalè, ne wa musinga mukolè mpindyewu, mwanèètù wa balùme mwìmpè, Fred Sothmann, wa ku...ne mukàjèndè, wa ku Saskatchewan, mu Canada, udi mwanji kutùdìlakù mùneemu bwà kwikala neetù, mu ditùngà dyètù emu, mupici wa njila; kàdi mu bwobùmwe bwètù, mwanèètù munanga, Mwanèètù Fred Sothmann udi musòmbe pàapa wàwa. Yèyè nguwwa mulongòlòle ndongamu wa kàmpanyè bwànyi mèmè pàmvwà mu Canada.

³⁸ Ne mwanèètù mukwàbò wa musinga mukolè uvwa pèndè kale wàwa mwena Canada, uvwa mwena kantu-ku-byanza awu, ne udi mwà kujaadikila bàà pa buloba ne kwèna mwà kutàmba Nzambi ku dipèeshashanga. Yèyè ne mulundà wèndè mbenzè bulongolodi kàmpàndà bwà mfrangà bwà kwibakabò mwaba kàmpànda, anyi bwà lwendu lwà mudimu wà bwambi wà ku baabèndè, bulongolodi bwà mfrangà. Ki kumbiikilabò ku Oakland, bwà disangisha kàmpànda, bàmba ne bàvwa ne mfrangà. Bàvwa mwà kuditùdila dyònsò mfrangà, mu bulongolodi bwàbò bwà mfrangà abu.

³⁹ Mwanèètù Fred ne mèmè twètù kuteeta aci bwà mfrangà yìvwà naayi Mwanèètù Fred, yìmvwà nciyi muswè kwangata mèmè bu muntu-nkàaya to. Ki pashiishe twètù kupàngadika ne tuvwa mwà kucifila kùdi beena Canada ne katùyi twangata nànsha mulàmbù to, kàdi kacyakenda bìmpè menemene to. Masangisha awu àvwa mimpè. Kàdi bu mutùvwà katùyi bangàte mulàmbù to...Èkéleeziyà nànsha yèyè mwikàle wa ùyiila mìliyaalà nkàmà yà ndola, udi ànu mwena dibànzà, kùdi Nzambi, bwà kwangata mulàmbù. Ncitùpà cyà dikuukwila. Nènku's nudi nwiba cyòci aci...Nànsha mùntù mbèngangana ne mfrangà ne bintu byà mùshindù awu amu, mèmè kusangana ne, pàdi muntu mupiiile, s'mbìmpè ànu wìtaba ne udi mupiiile, bwalu mèmè ne Mwanèètù Fred twákamòna ne kacyakafila cipeta cimpè to.

⁴⁰ Nènku, Mwanèètù Borders, pàngàakashiyanganà ne Mwanèètù Fred ne kulwà kùnùvwà ku Oakland aku apu, s'ngàkamba ne: "Kanùcyènji to. Endèshaayi ànu kabòndò kàà mìlàmbù aku, nwàngatè mulàmbù, nènku, cyònsò cidiku aci, nùcyèlè mu bulongolodi bwènù bwà mfrangà bwà masangisha makwàbò mwaba kàmpànda."

41 Nènku kumpàlà kwà masangisha kujikawù, Mwanèètù Border ne balundà bèndè kulwabò kùndi, bàmba ne: “Bùngi bùtùvwà batùùle mu—mu disangisha abu, mbùmàna kwangata.”

42 Ki pashìishe, kùkaadi ndambù wa matùkù, kwenzayè malongodi bwà masangisha kampànda mu San Jose, mu Californie, mùvwàye ne ndambu wa, ngeela meeji maèkèleeziyà makùmi àsambòmbò anyi makùmi mwandamutekètè mu cibandabanda amu, a miitabuuja ònsò mashiilèshiiàngàne miikàle àkwàcishangana mu mudimu. Twètù kwenza disangisha dilenga dyà dikèma, ne netùkwwàlùkilè cyàkàbidi, mu ngondo wa dikùmi ne umwe. Tudi ne disànkà dyà kwikalakù neenù pàmwè neetù, Mwanèètù Borders ne Mwanèètù Fred bàdi basòmbe paanyimà pààpa bàba. Nènku bantu aba bàdi pàmwàpa beenyi kunùdi nwènù, kàdi batu bânà bèètù bàà mushinga mukolè kùndi mu madimi a bwambì mwàmwa, bàlwangana ne mwàbò mwònsò bwà Diitabuuja ditùdi tutwà nyama ku mikòlò edi. Nzambi àkubènèshè, mwanèètù wa balùme. Tudi ne disànkà dyà kwikalakù neenù mu dindà emu, mu kaatàbèrnaclè kakesè, kàà kale aka. Kàkèena nànsha kàà bàbandila kiine to. Kàdi kùdi cintu kampànda mwaba ewu, cidi ne, tudi bamanyè ne Nzambi mmusòmbèle mwab’ewu, nudi numòna’s, pa nànkù tudi ne disànkà bwà bwalu abu. Ne kùdi bânà bèètù bakwàbò bàà mushinga mukolè, bu ne mvwa ne dîbà dyà kubàtèèla, bàdi nèètù leelù ewu.

43 Mpindyewu ndi ne mwoyi kuulukuulu ne nsambila ne mu ndambù wa matùkù àdi àlondà aa, bu Mukalenge mwà kwanyisha, Ndi muswè kuya, bu mùndi ndyùmvwà mulombòdiibwe...Neyèna mwanji kufila dimanyisha to. Disangisha dyàlondà, ku Ohio, bwà kwikala ne Mwanèètù Sullivan, mu bitùùdilu amu, munda mwà cikondo cipi. Mùdi ànu mu ntàntà wa kilòmèètà mitwè ku lukàmà ne makùmi àsambòmbò cyanàànà kuntwaku, ngeela meeji, Gene, cintu cyà bu nànkù awu. Ndwendu lulenga be, wèwè kùyi ne cyùdi mulongòlòle bwà diikisha dyèbè, bu Mukalenge mwà kutùngunuka ne kutùlombola. Muntu wa maalu malenga wa dikèma, nènku tudi twanyisha Mwanèètù Sullivan, bikolè be. Ànu...Yèyè ki mulombodi wa cimenga aci. Yèyè nguwva mulombodi wà cimenga kumpàla, mwikàle ànu mwena Kentucky wa cyena-kale. Ki cyònsò cindiku mwà kwamba bwèndè yèyè. Pàmvwà mutwilàngàne nendè ditùkù adi mu... Bùbidi bwètù tùvwà bakolèshiiibwe ku mikùnà yà ku Kentucky aku. Kungambilayè ne: “Ucitu ànu ne dikùsà dyè dyà cikotà adi mu nshingù anyi, Billy?” Bwà nwènù kumanyakù mùdiye—mùdiye mwena Kentucky’s. Mpindyewu tùbuululààyaaku mu...

Ki mbwà kudyombola bânà bèètù beena Kentucky mwaba ewu to, Mwanèètù Jefferies, ne bakwàbò. Mèmè paanyi’s ndi mwena Kentucky, nudi bamanyè’s. Ndi nnwàmbila cintu

cimwèpelè citùdì twètù. Katwèna beena Kentucky to, anyi katwèna beena Àmèrikè to. Tudi beenyi ne beena lwendu. Tudi twenda tukèbangana ne Cimenga cìcilwalwà.

⁴⁴ Mpindyewu bwà kubala, tùbalàayi mu Mukàndà wà Èkèsòòdè, bwà tusunsa ndambù. Ndi njinga kubala mu nshapità wa 23, ku mvensà wa 20 too ne ku wa 23, mukùmbajilakù. Nènku ndi muswè kwangata cyena-bwalu mu dindà emu, cyà bu nùnkù ewu, cyà eci's wè, èyowà: *Disùngidiibwa Mu Kaabujimà*. Nènku ncyàkunènga to, mu dyakula, mpindyewu pàmvwà munwíndile bwà nùbuululè mu Mukàndà wènù ne nshapità apu.

Tàngilá, ndi ntùma Mwanjèlo kumpalà kwèbè, bwà kukulama mu njila, ne bwà kukufikisha ku mwaba wúndi mémè mulongòlòle.

Ùdimukè kumpalà kwèndè, . . . ùtumikilè díyì dyèndè, kùmuyòbolù nànsha, bwalu kàakukufwila luse bwà dishipa dyèbè dyà mikenji to, bwalu dínà dyànyì didi munda mwèndè.

Ndi mutwishìbwe ne disangisha ndimanyè ne Mwanjèlo ewu ùvwa Nganyì. “Dínà Dyànyì didi munda Mwèndè.”

Nènku bu wèwè bushùwà mwà kutùmikila díyì dyèndè, ne kwenza cyònsò cìndì mémè ngamba, díbà adi mémè nèngùikalè mwena lukunà wa beena lukunà bèèbè, ne mulwishì wa balwishì bèèbè.

Bwalu Mwanjèlo wanyì neàye kumpalà kwèbè, ne neàkufikishè. . . kùdì beena Amòlà, . . . beena Hitì, . . . beena Pelizì, . . . beena Kaanàànà, . . . beena Hiwì, ne . . . beena Yebusà; ne mémè nèmbàbutùlè.

⁴⁵ Mukalenge àbeneshèku Díyì Dyèndè patùdì twakula mpindyewu bwà tusunsa tukesè apa, nwènù basambile. Mwua ngeela meeji ku cyena-bwalu eci, cyà ne: *Disùngidiibwa Mu Kaabujimà*.

Èkèleeziyà ùtu mu—mu banyààbanyà. Ki mwikalàYe misangu yònsò, bwà búngì bwà bidimba, too ne pààlwà Yesù. Kàdi Udi ùdya cyòmbe ne bululu kàdì pèndè ne dijiba difila kùdì Nzambi. Bu ne tuvwakù bamanyè, ewu ng'Èkèleeziya wa Nzambi udi ne mwoyi; kí m'Branham Tabernacle to, kàdi Branham Tabernacle ùdi ànu citùpà Cyèndè cyanàànà. Kùdì tabernacles mikwàbò yà nànkù awu mu ditùngà dijimà emu.

⁴⁶ Mwanèètù Snelling, dilòòlò edi, ùdi wènza mudimu wà dibàtiiza. Nkààvwa mupwè mwoyi ne Mwanèètù Curtis ùvwa mungambile bwà kumanyisha cyòcì aci, anyi mungambile makèlèlèlè awu ne, neàwènzè. Udi wènza mudimu wà dibàtiiza. Nènku muntu kaaba aka, yèyè kàyi mwanjì kubàtiijibwa to, mòna's, Mwanèètù Snelling mmufwànyine kwikalà ne disànkà dyà kwenza cyòcì aci, dilòòlò edi. Awu n'Tabernacle de la Sainteté mu Utica. Ne Mwanèètù Junior Jackson, mu New

Albany. Ne kùdi èkèleeziyà yà nàнку awu yàbúngì mu ditùngà dijimà. Kàdi twètù bònsò, mùdibi bimwèka, tudì ànu ku luseké lwà bacìmùnyìibwe, mu mùshindù kampànda.

⁴⁷ Ngǔmvù Mwanèètù Neville ùmanyisha mu dindà emu, paanyimà pààpa ne, ncimvwilè mu meeji mu mùshindù kampànda ne, mbyenzè bu ne bantu bàdi bènda bàseesuka bàya kule ne disùngidiibwa. Bìdi bimwèka bu ne kùdi cintu kampànda, cyà ne, bantu mbacìmòne, ki bàcisàka ànu ku luseke ne: “Kaa, èè, Nzambi’s ùdi mwà kucyèenza.” Kàdi aci kì ndwidì lwìmpè to.

⁴⁸ Mpindyewu, Mòsà, pààkabìikidìibwàye kùdi Nzambi, ùvwa mupròfetà mu kaabujimà, mukùmbànàngàne.

Pàdi Nzambi ùtùma muntu bwà kwenza cintu kampànda, Yèyè ùdi ùmupàya ne byònsò bìdì bimukèngela. Nzambi Yèyè mubiikile muntu bwà kwikalayè muyiishi, Ùdi ùtèeka cintu kampànda munda mwèndè cyà diyiiishayè naaci. Yèyè mumubiikile bwà kwikalayè mulongeshi, Ùdi ùtèeka cintu kampànda munda mwèndè cyà kulongeshayè naaci. Yèyè mumubiikile bwà kwikalayè mupròfetà, Ùdi ùtèeka cintu kampànda munda mwèndè, bwà kumònayè bikeènà-kumòna ne kwikalayè mupròfetà. Nzambi ùtu misangu yònsò ànu ùpàya muntu Wendè mu mùshindù mukùmbànàngàne.

Nènku ki cyàkenzàYe pààkatùmàYe Mòsà mu Èjiipitù. Wàkamukolesha mu mùshindù kampànda. Ne Wàkamufwimba, ne kumwenza, ne kumulongolola. Paanyimà pàà Yèyè mumanè kulaya Abraham, nkàmà yà bìdimu kumpàla ne, Ùvwa mwà kusùngila cisàmbà, pashìishe Ù—Ùvwa ne eci mu meeji ne Ùvwa mwà kwenza Mòsà ànu mùvwà Mòsà mwenjiibwe amu. Mòsà ùvwa mupròfetà mukùmbànàngàne. Nènku pashìishè, mwikàle mupròfetà mukùmbànàngàne, dìbà adi . . .

⁴⁹ Ànu mùdibi bwèbè wèwè amu, pawikalà mwena Kilistò, Nzambi kàtu wènza beena Kilistò bàà bashiikile mu njila to. Nzambi ùtu wènza beena Kilistò bakùmbànàngàne. Nzambi kàtu wènza bayiishi bàà bashiikile mu njila to, kàdi muyiishi ùdi mwà kwikala yèyè wa mushiikile mu njila. Nènku Nzambi ùtu ùvwija bàna Bèndè beena Kilistò, kàdi mingà misangu ùtu mwena Kilistò wa mushiikile mu njila. Kàdi kì mmeeji a Nzambi bwà bìikalè mùshindù awu to. Njila yàbò nyidì yìkabwelakana ne ndongamu wa Nzambi bwà nsòmbelu wabò, nènku ki cidì cibàvwijà mùshindù wùdìbo awu. Nzambi kì ngudi muswè bwà kwikalabò beena Kilistò bàà bashiikile mu njila, anyì bayiishi bàà bashiikile mu njila to, bàdya cibàngà ku nseke yònsò, anyì . . . Yèyè mmuswè bwà kwikalabò biimàne pankaci bikùmbànàngàne.

⁵⁰ Mpindyewu, Mòsà, Nzambi ùvwa mumwenzè mupròfetà mukùmbànàngàne, bwà disùngidiibwa dikùmbànàngàne.

Nènkù Mòsà ùvwa mudilàmbùle bikùmbànàngàne mu byanza byà Nzambi. Ki bwà cinyi cyàkamuvwija civwàye aci. Ùvwa mukùmbànàngàne mu Nzambi mu mùshindù wà ne Nzambi ùvwa mwà kumweyemena.

⁵¹ Ndi ndikonka, mu dindà emu, twètù bu beena Kilistò, ní tudikù balekèlèle diswa dyètù sungasunga, ne badilekèlèle twètù biinè bikùmbànàngàne kùdi Nzambi, mu mùshindù wà ne Nzambi ùdiKù mwà kutwèyemena mu mwaba wùdiYe mutùtèèke. Ndi ndikonka, mu dindà emu, bwànyì mèmè mwinè, ní ndi mwà kudilekelela kùdi Nzambi mu mùshindù wà ne Nzambi mmufwànyinekù kungeyemena, mufwànyinekù kweyemenakù Mwanèètù Neville, mufwànyinekù kweyemena kasumbù kèètù kàà balubuludi, kasumbù kèètù kàà balami, anyì bidimba byètù byà èkèleeziyà wetù. Tudi bònsò ne kaaba kampànda, ne tudi ne mudimu kampànda.

⁵² Mwambi ùdi ne kaaba kàà mudimu, bwà kwimanayè ne kuyiisha mabanji àdi kaayi kwondola kumana a Kilistò, kàyi ùdya cibàngà to, pìikalàye mubiikidiibwe bwà kwikala muiyiishi. Kí mmufwànyine kulaminyina cintu nànsha cìmwè bwà muntu nànsha umwe to, yèyè mubiikidiibwe bwà kwikala muiyiishi.

⁵³ Ne cidimba cyà èkèleeziyà, yèyè mubiikila bwà kwikala cidimba cyà kasumbù kasungùlùke aka, díbà adi kí mmufwànyine kudyà cibàngà to. Èkèleeziyà yèyè wìtabuuja ne kabivwa bikèngela bwà twètù kunàya twartà twà mfrangà, díbà adi kabivwa bikèngela bwà cidimba aci kulengaci dibùki dyà twartà nànsha. Twètù katùyi twitabuuja dinwà dyà maalà to, bìvwa bikèngela bwà yèyè kutùma mpàla mu cisuku ànu menemene kule ne maalà. Twètù katùyi twitabuuja dinàya dyà twartà twà mfrangà, anyì dinwà dyà mfwankà, kabivwa bikèngela bwà cidimba cyà èkèleeziyà ewu kulengaci cintu bu nànkù nànsha. Nzambi ùdi ùfila disungidiibwa mu kaabujimà. Patùdi . . .

Yèyè neàcyènzè bu twètù mwà kudilekelela twètù biinè mu kaabujimà kùdiYe. Twètù baswè kudifila mu kaabujimà mu cianza Cyèndè, díbà adi Nzambi ùdi mwà kusòmbela munda mwètù. Kilistò, Ditekemena dyà Butùmbi, Yèyè ùdi mwà kudileejila Yèyè mwinè mu twètù patùdi tudyumusha mu njila. Díbà adi meeji ètù àdi meeji Èndè. Nudikù bafwànyine kudifwànyikijila Kilistò ùnwa cifwankà anyì? Nudikù bafwànyine kudifwànyikijila Kilistò ùnwa maalà, anyì ùnàya twartà anyì? Díbà adi pìikalàbi ne nyumà webè ùdi citùpà cyà Nyumà Wendè, Yèyè mmuswè bwà kwikalaci pa ditonda dyèbè. Kàdi wèwè ngudi wanyishila dyabùlù bwà kubwela ne kwangatayè bukòòkeshì. Ne díbà dyònsò, mu mwoyi wèbè, mu ndòndò mwàmwa, s'udi umanya ne udi mupìile paùdi wenza bintu abi apu.

Ne pàdi cidimba mwà kwakula bibi bwà cidimba cikwàbò, wêwès udi mumanyè ne mbibi. Mbanùtumine dìyi bwà kusambidilangana muntu ne mukwèndè, kî nkwambangana bibi muntu ne mukwèndè to, kàdi kunangangana muntu ne mukwèndè. Nènku muntu yéyè mudishinde, tùmujuaàayi, tumukwàcishaayi. Mpindyewu, aci ncidi citùvwijà cisumbù cyà—cyà—cyà beena kwitabuuja badyènzè cimùkù. Mpindyewu, patùdi katùyi tutùmikila aci to, díbà adi katwèna tutùmikila Nzambi to ne tudi tubiipila Nzambi. Nènku ki bwà cinyi, èkèleeziyà wetù, bantu bèètù kabèèna mwà kutanta to, èkèleeziyà kèna mwà kuya kumpàla to, bwalu tudi bakòsòlòke, bònsò. Mwàkambà Yesù ne: “Lwevènyà lukesè lùdi lùtùntumuna mutanda mujimà.”

⁵⁴ Mpindyewu, kasumbù kàà balombodi bàà èkèleeziyà, anyi bu mùdi ba—balami, bafwànyine kulwa kwamba ne bivwa bikèngela bwà twètù. . . bèèla meeji ne bivwa bikèngela bwà twètù kwibaka tabernacle mupyamùpyà. Aci cyòci disungula dyà balami, ne bakonkè balubuludi kàdi bóbò kabàyi ne mfrangà bwà kucyènzà, díbà adi bàdi bènza ndongamu wa lwibàkù wa mùshindù wa bwena utùdi nendè mpindyewu ewu. Ne pashiishe bàcileeya disangisha mu kaabujimà, mùvwàbi bikèngela bwà twètù kwikala, èkèleeziyà mujimà mwikàle mudishikàmine. Díbà adi èkèleeziyà yéyè mwelè tukàndà bwà tabernacle mupyamùpyà, díbà adi bivwa bikèngela bwà twètù bònsò pàmwè kukwàcishangana mu diibaka dyà tabernacle mupyamùpyà awu.

⁵⁵ Bwà kwamba menemene, mèmè mwinè, pàakambàbo bwà tabernacle mupyamùpyà, bwànyì mèmè, mvwà mbènge meeji awu. Ncyà bushùwà. Mèmè kwamba ne: “Kabyèna ànu bitùkèngela menemene tabernacle mupyamùpyà to. Pàmwàpa nèngùùmukè kaaba aka àbidi àdi pansi aa, mùdi Mukalenge. . . piikalàbi ne cidiYe ùndeeja necyènzekè. Citùdi tujingila tabernacle mupyamùpyà ncinyi? Katwèna ne mfrangà miinè to.”

⁵⁶ Pashiishe mèmè kulwa ne kuumvwa njiyà yà èkèleeziyà, yà ne èkèleeziyà, mu ciibungì, ùvwa ùmwèka muciswe. Díbà adi cingénjì ncinyi? Mèmè kulekelela àanyi meeji sungasunga awu ne kudyèla luseke lùmwe ne èkèleeziyà. Bushùwà, twènzàayi nànkù. Piikalàbi ne. . . Mùshindù awu ngutùdi twela nshòbò, ki mùshindù wùvwàbi mu cikondo cyà Bible, mùshindù wùvwa èkèleeziyà wèla tukàndà. Bu—budishikaminyi, bisumbù byà bantu, bàdi bàdisanga. Búngì mbupite bulòbò. Pa nànkù, ki bwà cinyi, mèmè kwamba ne: “Cyà bushùwà, piikalàbi ne ki mùshindù wùdi èkèleeziyà muswè, piikalàbi ne ki cidi Nzambi ùkèba, Yéyè ngudi mutàmbe kwikala ne bukòkeshi bwà kwela tukàndà munkaci mwà cisumbù cijimà cyà bantu kutàmba mùdiYe mwà kwenza naanyi mèmè, bwalu ncyèna ne cikèèna—kumòna bwà kwamba ne kabiiikadi nànkù to.” Pa nànkù tudi tudyèla luseke lùmwe ne èkèleeziyà, ne tuya

pàmwè ne èkèleeziyà. Nènku ndi paanyimà pààci, bwà kwenza cyònsò cindiku pàanyi mwà kwenza aci, nwamònu's, bwà kwambulwisha èkèleeziyà.

⁵⁷ Ki cìvwà cikèngela bwà kwikalaci kabingilà kàà mwena Kilistò yònsò ne muntu yònsò mu èkèleeziyà, nkàà twètù kudyènza cimùkù ne kuswikakana pàmwè. Cyònsò cidì èkèleeziyà ùsungula mu dyela dyà tukàndà aci, ki cìvwà cikèngelà twètù kutwà nyama ku mikòlò. Pashiishe kwamba, cileejilu ne, tudi... baswè kushintulula cintu kampàndà mu èkèleeziyà. Èè, dībà adi, balubuludi bōbō baswè kucyènza, kùdì... muntu mukwàbò yéyè muswè kucyènza, balami, bōbō baswè kushintulula cintu kampànda, aci cidì cilwa kumpalà kwà èkèleeziyà, èkèleeziyà pàmwè dībà adi. Kàdi piikalà wetù—piikalà wetù mmwènenenu wùmwèka mushiilàngàne ndambù ne cidì èkèleeziyà mujimà mwambè, tùlekelelàayi wetù mmwènenenu awu, bwalu awu ki mùshindù wùmwèpelè wutùdiku mwà kushàala badyènzè cimùkù. Ne bu èkèleeziyà ewu mwà kutungunuka ànu mùshindù wunùyaayi mpindyewu awu, ne kwikala badyènzè cimùkù, Nzambi's neikalè... Kakwèna mikàlù to, ku cyènzàYe, bu twètù mwà kudyènza cimùkù. Tudi ne cyà kudyènza cimùkù. Ki mùshindù wùtùdì baswè kwikala, bakùmbànàngàne muntu ne mukwèndè, ne pashiishe batàmbe bakùmbànàngàne mu byanza byà Nzambi.

⁵⁸ Dībà adi bidì bikèngela twikalè ne muntu utùdì twitabuuja ne ùdì ùyiisha Diyì dyà Nzambi. Muntu awu yéyè kàyi ucyènza to, dībà adi tùpetè muntu kampànda udi ucyènza bushùwà. Ki mùshindù wutùdì ne cyà kwimana ngwòwò awu. Piikalà kasumbù kàà balubuludi kakàyi kaswè kutwà cidì cimpè nyama ku mikòlò to, dībà adi bunùdì naabù mbwà kusungula muntu kampànda wíkala mwà kutwà cidì cimpè nyama ku mikòlò. Nènku dībà adi panùdì nucyènza, shààlaayi biimànyinèpù. Aci ncinùtàngìle. Shààlaayi biimànyinèpù. Nènku, bònsò pàmwè, tudi tutwà Cintu cimwèpelè nyama ku mikòlò, ki Nzambi.

⁵⁹ Cidimba cyòci cyènzè cilèma, kanùmubèngi nànsha. Mwambùlwishaayi. Mujuulàayi kuulu. Disangàayi, nùteelejanganàayi muntu ne mukwèndè. Ki cidì Mifundù yàmba. Patùdì twenza cilèma, tùyaayi kumpalà kwà Nzambi. Kumpalà kwà twètù kuya kumpalà kwà Nzambi, bidì bikèngela bwà tuye kumpalà kwà muntu utùdì batàpe ku mwoyi awu.

⁶⁰ Ngáfumu ku dyenzejiibwa bwà kwenza nànkù. Ne ndi mumanyè ne mvwa mwenzè bibì. Mvwa mushimè, mufikishe mukàjàanyi ku dishima. Ngeela meeji ne nkàadi munùlondèleci, mu èkèleeziyà emu. Kùvwa ndambu wa matùkù, ànu àbidì àdì panshì aa, kùkaadi mbingu mitwè ku yisambòmbò. Bandumbùlùlà bàvwa bantondèshe bibì be, pa bwalu bwà lùnkètù elu, mu mùshindù wà ne ncìvwa mumanyè mwaba wùmwà to. Ncìvwa ngaalukidilakù kumbèlu mfùmina ku bìrò, bwà kudyàku cyàkudyà cyà mundaamuunyà. Ki téléfonè wa

kwètù kumbèlu kudilayè, ne Meda kuyayè bwà kwandamuna ku tèlèfonè aku. Kujikayèpu cyanza, kwambayè ne: “Bàdi ànu bandumbùlùlà abu cyàkàbìdì.”

61 Mémè ne: “Ncyéna mufwànyinekù kutwàla dilòòlò dikwàbò to. Mutù mmwenzè ànu bu wùdi wàmba kuntaayika. Lungènyi lùdi lùnjìmina, bìnkòkela eku, ne kwàka, ne eku.” Mémè ne: “Ncyéna mwà kubìtwàla to.” Ki mémè kulàndapuka apu, kwamba ne: “Bámblè ne ncyénàpu to,” ki mémè kunyeemena lubilu kumfundu kwà nzùbu.

62 Pàngälükidì... Meda ùtu muswè kuya ne maalu awu mu ôwò. Yèyè kulwa kutuutakeena naanyì ku ciibi, wàmba kudila mwadi. Kwambayè ne: “Bill, aci ki civwà cintu cijaalàmè cyà dyanza anyi?”

63 Wèwè’s udi ànu mumanyè mùtù amu. Mémè ndi mumanyè mùntù. Mémè kwamba ne: “Bushùwà’s. Ncivwa mu nzùbù emu pa dîbà adi menemene to.” Mvwa mumanyè ne Nzambì ùvwa mumpiishileci. Mémè ne: “Ncivwa mu nzùbù emu pa dîbà adi menemene to.”

Yèyè ne: “Kadi’s uvwa mund’emu pàbìikidiyè apu.”

64 Mu mapingaja amu mémè kuya kasambidila mwànà kampàndà wa mu dibòko uvwa usaama. Kàdi kumpàlà kwà mémè kuumuka kumbèlu, tèlèfonè kudilayè cyàkàbìdì, ki Joseph mwànà awu kuyayè lubilu kwambula tèlèfonè e kwambayè ne: “Papa, udi muswè mbámblè ne kwénàpù anyi?” Nudi numòna mùdì mpèkaatù ùnyangakaja maalu’s, ndekeelu wa byònsò ncifwànyine kwikala dîkù kaayi adi?

65 Yone wa Kumpàla, nshapità mwi5, ku mvensà wa 21, mmwambè ne: “Piikalà myoyi yètù kayiyi yitùpiisha to, dîbà adi tudi ne dyeyemena kùdi Nzambì.” Kàdi piikalà myoyi yètù yitùpiisha, mmunyi mutùdi mwà kwikala ne dyeyemena kùdi Nzambì? Tudi bamanyè ne, patùcidì ànu ne mpèkaatù udi kàyi mutonda, Yèyè kàakututèelejilakù to. Aci ncikolè, kàdi, cidì—cidì—cidì, èkèleeziyà ùdi ùkèngela bintu ebi.

66 Pashiishe ki mémè kubanga kusambidila mwànà wa mu dibòko ewu. Kàdi ndi mwenzè ànu ne mmulentèkèlè byanza, Mukalenge kuntàndisha Yè wàmba ne: “Wèwè’s udi mwambè dishima. Kwèna mukùmbànyine bwà kusambidila mwànà awu to.”

67 Mémè kukùdimuka kushiya muntu awu. Mémè ne: “Mukalenge, indilà wèwè ànu kaaba aka. Ndi ne bwalu bwà kulongolola.”

68 Mémè kubìikila ndùmbulùlà awu ne kuya ku birò, kumubiikidisha. Mémè kwamba ne: “Tàngilà, mukalenge, ndi mwambè dishima. Ndi mufikishe mukàjàanyi ku dishima. Ùvwa mwambè ne ncivwamù to, ne mémè kupàtuka kuya

lubilu kumfundu kwà nzùbu.” Ki mèmè kutonda bwalu abu ne kumwambilaci.

⁶⁹ Kujuukilayè kuulu ne kuntèekayè byanza pa dikaaya. Kwambayè ne: “Mwanèètù Branham, ntu misangu yònsò ànu mukweyèmène, kàdi ngààlu kukweyemena bikolè bitàmbe mpindyewu, muntu,” mwàkambàye, “udi muswè kulongolola bilèmà byèndè.”

⁷⁰ Mèmè kumwambila, kwamba ne: “Nkààvwa ne nsambidilè mwànà wa mu dibòko, kàdi Mukalenge kumpiìsha, munda mwà mwoyi wànyì, bwalu mvwa mumanyè ne mvwa mwenzè bibì.”

⁷¹ Pashiishe, ditùkù dyàkalondà, mukàjàànyì kwambaye ne: “Kùyaaya nkwèpi?”

Mèmè ne: “Ku nyòngòlò wanyì.”

⁷² Ki mèmè kuya ku nyòngòlò wanyì, lwà ku nord wa Charlestown kwàka, kùmvwà nya pa ciibidilu aku, munda mwà bidimu. Mèmè kubwelamù, ne kusambila ditùkù dijimà adi ne: “Éyì Nzambì, kùndekèdiku ngenza cyàkàbìdì cintu bu nàнку to. Mfwilèku luse, Mukalenge, bwalu pànkaadi ànu ne ntentekelè babèèdì byanza, bwà kusambila, dìbà adi mvwa mpiishiibwa.” Lwà pa dìbà bu isàtù nàнку wa dilòòlò, mèmè kupàtuka. Kùdi lubwebwe lunènè lùsanganyiibwa pambèlu apu. Ki mèmè kubànda pa lubwebwe alu ne kushààla mutàngile lwà ku esètè, byanza byela muulu, ntùmbisha Mukalenge. Ne kùvwa ànu cinyàànyà cìkolè muntwamu. Ki mèmè ne: “Mukalenge, bu Wèwè ànu mwà... Musangu kampànda Wàkapìcila ku luseke lwà Mòsà, ne kwàmbayè ne cìvwa... paWàkamutèèkà mu mutanta wà lubwebwe, ne cìvwa cifwànàngàne ne nyimà wa muntu.” Mèmè ne: “Udikù mwà kucyènda kàbìdì anyì’s, Mukalenge? Enzàku bwà mmanyè ne ndi mufwidìibwe luse.” Ki mèmè kwamba ne: “Bu Wèwè mwà kunkwàcishakù bwà cìmvwilè mu meeji. . .” Mèmè ne: “Mukalenge, ncìtu ne dikàndà dyàbùngì to, mu byeledi byànyì byà meeji, bwalu ncyènàku ne kàlaasà kalonga to.” Mèmè ne: “Kàdi ndi—ndi nditàcisha bwà kuKukwàcila mudimu. Udi mumanyè mwoyi wànyì, ne ncìvwa. . . Kabìvwa bikèngela bwà mèmè kwikala mwenzè cyòcì aci to. Ncìvwa ne meeji a kwenza nàнку to. Mutù wànyì wùvwa ànu bu wùdì wàmba kutùuka, mvwa mubindùlùke bikolè, ne mucyènzè ànu bu bantwè cyanza mu dikoshi pàvwà Sàtaanà munkwàte apu.” Mèmè ne: “Ní Wamfù luse, nKumònèku, dìbà adi, Mukalenge.”

⁷³ Nzambì mwikàle Mulumbulwishi wanyì; ànu lwà ku luseke lwànyì aku, mu kaaba kakesè mu bisuku amu kujuukamù kamvùnda kenzè bu Cipeepèlè nàнку, ne kulwaCì cyènda cìlonda kumpengà kwà nyòngòlò kùmvwà nsanganyiibwa aku, e kupweka kàdi kupìcila mu diitu amu. Kaa, mwanèètù, ditalala didì dipita cyumvwilu cyònsò kupìciladi kumutù kwànyì, ne mèmè kwela lubilà. Mèmè kudila mwadi. Mèmè

kwela mbilà. Ndi mumanyè ne mpèkaatù yànyì yàkafwidiibwa luse. Nwamònu's, mvwa mukòsòlòke ne Nzambi, ncivwakù mufwànyine kupetela mwànà awu disùngidiibwa to.

⁷⁴ Mémè. . . Ki ditùkù mene dyàkalondà adi kùvwa muntu wa ku Chicago, uvwa muntu munène, mwena Kàtòlikè ùcifùminakù ku dikùdimuna dyà mucìma, mijilu yà nshìbàshìbà yà mu mwoyi wèndè yìvwa myùle mùtù ndundu wa munda wa màshinyì mupàte ne mupùnyà amu, ne bàkaavwa bateetètètèe kuyikòsa kùkaavwa ntàntà mule, ncìvwàbo baswè kwenza, kàdi yèyè kàyi muswè kubàlekela bàcyènza to. Ndekeelu wa byònsò kupetayè muyiikì wà bàbidì. Miiyikì yà bàbidì ayi, tutu tushààla naabò too ne patùdi tupeta cidi kaciyi cyènda bimpè. Kàdi muntu awu mmwenzè ànu ùbwela anyì, ki Nyumà Mwìmpè kuya mu maalu a kale a nsòmbelu wèndè ne kupàtulayè cintu kampàndà cìvwàye mwenzè pàcìvwàye mwitabi wa misà mu èkèleeziyà wa Kàtòlikè. Yèyè ne: “Aci mbulelèlè. Aci mbulelèlè bwà meeji matòòke.” Yèyè ne: “Udi uswa kwamba ne ki cìvwa cindaminyina anyì?”

Mémè ne: “Ki mundidimbì wùmwpèlè wùndiku mwà kumòna mu nsòmbelu webè.”

⁷⁵ Kwalukilayè e kuya kambila ngàngàbukà, kwamba ne: “Èyo, longòlòlà bintu mpindyewu, bwà dipandiibwa adi.”

⁷⁶ Ngàngàbukà ne: “Netùkenketè cyàkàbidì mwoyi awu.” Kàdi mmwenzè ànu ùkenketamù, kwambayè ne: “Kabyèna bikèngela bwà kukupandabò to.” Nwamònu anyì?

⁷⁷ Myoyi yètù yòyì yitùpùisha, bìdi bitùkèngela disùngidiibwa mu kaabujimà. Katwèna baswè kwikala bàshìile mu njila to, èkèleeziyà. Tudi baswè kwikala èkèleeziyà mulelèlè anyì katwikadikù èkèleeziyà to nànsha kakesè. Tudi baswè kwikala beena Kilistò balelèlè anyì katwikadi beena Kilistò to nànsha kakesè. Tudi baswè disùngidiibwa mu kaabujimà ku biibidilu byètù, ku mpèkaatù yètù, ku ngeelèlù wetù mubì wa meeji, ku ngenzèlù wetù mubì wa maalu, ku kalèngù kèètù, byònsò bitùdiku benzè. Tudi baswè disùngidiibwa mu kaabujimà, bwà pàdi bantu bàbwela mu èkèleeziyà ewu, bwà bàbàsambidìle, nekwikalè ànu kasùmbù kakesè aka cyanààna (pàmwàpa kabàyi bapite pa lukàmà, anyì nkàmà yìbidì to) basòmbe apa, kàdi nebiikalè ànu menemene mu byanza byà Nzambi. Nènu patùdi tusambila, díbà adi Nzambi neùmvwè mu Dyulu. Nzambi ùdi ùkèba muntu udiYè mwà kukwàta mu byanza Byèndè, muntu udiYè mwà kwamba ne: “Ndi nèndè dyeyemena. Ndi mwà kutùma musadidi Wanyì udi usaama ewu, ku Branham Tabernacle mu Jeffersonville, bwalu kasùmbù kàà bantu aku bàdi díyì dimwè.” Cintu kampànda's necyènzekè.

⁷⁸ Èè, tàngilàayi bìdiYe ùtvènzela mu ngiikàdilù utùdi tusanganyibwa ewu. Ncinyì cìvwàYekù mufwànyine kwenza bu ne tuvwa ne mwoyi wùmwe ne díyì dimwè? Mùshindù wùmwpèlè wutùdiku mwà kwenza cyòci aci, nkusangisha

myoyi yètù pàmwè ne dinangangana dyà bwànà bwètù, kutùmikila beena mudimu bàà èkèleeziyà, ne mpaasàtà, ne mpaasàtà ùtùmikila Nzambi. Dìbà adi Nzambi ùdi ùkwàcila mudimu mu mpaasàtà, mu kasùmbù kàà balombodi, ùbwela too ne mu èkèleeziyà, ne twètù bònso pàmwe biikàle musùmbà wùmwepelè bwà Bukalenge bwà Nzambi. Dìbà adi Nzambi neùmvwè, patùdi ne cisùmbù cidyènzè cimùkù. Cintu nànsha cimwè kacinùtácishikù to. Kanùtekeshiibu mu mabòko kùdi cintu nànsha cimwè to.

⁷⁹ Mpindyewu, muntu wa mùshindù awu ki uvwa Nzambi mulongòlòle bwà kukwàta buloba. Mòsà uvwa mukùmbànàngàne, ùvwa muntu uvwa kàyikù mufwànyine kudyà cibàngà to. Pìikalàbi ne kùvwa dibìnduluka ne makòkyanganyi, ne bikwàbò, yèyè kàvwakù mwà kudyà cibàngà to. Ki cidì Nzambi muswè bwà twètù kwikala mpindyewu ncyòci aci.

⁸⁰ Pàlò ùvwa muswè kwitaba, kwambayè ne: “Mòsà, nwènù bònso nudi mwà kuyaayi, ne, kàdi, nùshiyàayi bânà bèenù balela paanyimà, anyi nùshiyàayi bimwè byà ku bimunà byènù mùneemu.”

⁸¹ Mùshindù awu ki wùdi dyabùlù muswè bwà mwena Kilistò kulwayè. “Nebiiikalè bîmpè bwà wèwè kukashààla wa mu èkèleeziyà, kàdi kùfwidikù Jones awu luse to. Nebiiikalè bîmpè bu wèwè mwà kulwa ne byèbè...bu wèwè mwà kuya... Kabyèna bikèngela bwà wèwè kulekela dinwà dyèbè dyà mfwankà adi, dinwà dyèbè dyà maalà adi, dishima dyèbè, diiba dyèbè, dimònà dyà bilèmà byà bakwàbò, dyamba dyèbè dyà maalu mabi a bakwàbò adi to. Kabyèna bikèngela bwà wèwè kulekela abi to. Shààlà wèwè ànu wa ku èkèleeziyà cyanàànà.”

⁸² Kàdi Mòsà kàvwakù mudì wa cibàngà to. Ùvwa muswè disùngidiibwa mu kaabujimà. Wàkamba ne: “Katwàkushiyakù nànsha cikònò paanyimà to. Netwàngatè byònsò bìdi bu byètù abi, patwàyà kakuukwila Mukalenge apu.”

⁸³ Mùshindù awu ngùvwàbi bikèngela bwà èkèleeziyà kwikalayè. “Netwàngatè bwakàne. Netwàngatè cijila. Netwàngatè Nyumà Mwîmpè. Netwàngatè cisùmbù cidyènzè cimùkù patwàyà ku cyoshelu apu. Netwikalè cisùmbù cilelèlè. Katwàkushiyakù cintu nànsha cimwè paanyimà to. Netwàngatè byònsò. Kakwàkushààlakù nànsha cikònò mùneemu to.” Nudi bamanyè’s, nènku bantu bàdi mwà kusambila mu mùshindù wa bikèngela dyabùlù àbìlekèlè.

⁸⁴ Ki mùshindù wàkenzà Mòsà ne cisùmbù cyèndè. Bàakaya kwàka ne kubwelabò mwinshì mwà mashi. Nwamònu ne, pàvwàbo kabàyi babwelè mwinshì mwà mashi to, kakùvwa disùngidiibwa mu kaabujimà to. Mòsà, yèyè mwinè, ùvwa mudyènzè cimùkù ne Nzambi, kadi Izàlèlèlè to. Mùcivwa ànu mpèkaatù. Ne bóbò bàvwa bânungeena Mòsà, ne bàmba ne:

“Bwà cinyì, bwà cinyì udi wenza nùnkù? S’udi utùtwàdila lutàtu lupite búngi.” Bwalu, Pàlò ùvwa ànu ùbàvudijila búngi bwà màdyòtò, ne bikwàbò. Awu ùvwa m’Mòsà; ùvwa menemene ànu mu byanza byà Nzambi, musùngìdiibwe mu kaabujimà ku didiishà dyà mikòòkò, bwà kudiisha mikòòkò yà Nzambi. Ùvwa musùngìdiibwe mu kaabujimà, yèyè mwinè. Kàdi bantu bóbò kabàvwa basùngìdiibwe to, bwalu kùcivwa ànu minungànyì munkaci mwàbò.

⁸⁵ Dilòlò kampàndà dyàkatùmà Nzambi díyì ne bìvwa bìkèngela bwà mwànà wa mùkòòkò àshipiibwè, cifwànyikijilu cyà Kilistò, ne mashi kuzabikiibwa mu hizòpà, mbwena kwamba ne, ànu bisosà byètù ebi (byà ciibidilu, bidipwekshè), ne kulaaba pa mukamba wà ciibi ne ku makunji, ki pààkasùngìdiibwà Izàlèlèlè mu kaabujimà mpòpò apu, kabàyi bashiye nànsha cikònò paanyimà to. Byònsò bìvwa bu byàbò byàkasùngìdiibwa. Mèkù àbò, bananga bààbò, ne byònsò byàkasùngìdiibwa pààkabwelàbò ànu menemene mwinshì mwà mashi.

⁸⁶ Ki pààsùngìdiibwà èkèleeziyà mu kaabujimà mpòpò apu, pààbwelà bintu byònsò mwinshì mwà Mashi. Pààbwelà mpèkaatù yèbè mwinshì mwà Mashi, dinwà dyèbè dyà mfwankà, dinàya dyèbè dyà twartà twà mfrangà, diibila dyèbè, diiba dyèbè, dishima dyèbè, pèèdiibwà byònsò abi mwinshì mwà Mashi, díbà adi nekwikalè disùngìdiibwa mu kaabujimà. Wèwè mwenzèle muntu bibì, cilongòlòlè. Kwèna mwà kubweja aci mwinshì mwà Mashi to, kacyakushàalakù to. Kwèna mwà kucibwejamù to. Cintu kampànda kacyakukulekela ùcibwejamù to. Pìikalà wèwè mwinè mu kaabujimà, mubwejiibwe ànu menemene mwinshì mwà Mashi, nekwikalè disùngìdiibwa mu kaabujimà; díbà adi neupetè budishikaminyi mu mùshindù wùtù kacya kùyikù mwanji kumanya kwònsò eku to. Pààbwejiibwà bintu byònsò mwinshì mwà Mashi, bìvwijiibwe mu dikòòkela ku Bukalenge bwà Nzambi, díbà adi nekwikalè disùngìdiibwa dilelèlè.

⁸⁷ Yesù ùvwa ànu muntu menemene, mu kaabujimà. Ùvwa mwà kudila mwadi bu muntu. Ùvwa mwà kudyà bu muntu. Ùvwa mwà kucyòka bu muntu. Ùvwa ànu muntu menemene, mu kaabujimà, mu buumùntù Bwèndè bwà mubidi abu. Kàdi mu Nyumà Wèndè, Yèyè ùvwa Nzambi ànu menemene, mu kaabujimà, mu mùshindù wà ne Wàkavwija mubidi Wèndè mukòòkèle Nyumà uvwa munda Mwèndè awu. Nudi numòna’s, Yèyè wàkateeciibwà mu mùshindù yònsò ànu mutùdi twètù tuteeciibwà emu. Ùvwa muntu, kàyi Mwanjèlo to. Ùvwa muntu. Ùvwa ne majinga ne mateeciibwà, ànu mutùdi twètù naawù emu. Bible mmwambè ne Ùvwa naawù. Ùvwa muntu, kàyi Mwanjèlo kumutù kwà diteeciibwà nànsha. Ebèlù 1 mmwambè, ne: “Yèyè ùvwa...” Ebèlù 1.4 mmwambè ne: “Wàkapwekeshiibwà kutàmba Banjèlo.” Ùvwa muntu, muntu ànu menemene; mu mùshindù wà ne Nzambi wàkangata muntu

ànu wetù wa menemene ewu, bwà kutwàla disùngidiibwa mu kaabujimà, ne WàkaMuuja tètè ne Nyumà Wendè. Nyumà Mwimpè ùvwa munda Mwèndè, kàyi mupima to. Ne Yéyè wàkateeciibwa bu twètù. Kàdi Ûvwa Nzambì ànu menemene. Wàkacijaadika pàakabiishàYe bafwè, pàakiimanyikàYe bufùki, mbù mutombòke ne bipeepèlè byà bukolè. PààkaakulàYe ne micì, ne bikwàbò, byàkaMutùmikila. Ûvwa Nzambì, munda amu. Ne Yéyè ùvwa mufwànyine kwikala muntu, bwalu Ûvwa muntu, kàdi WàkaDilàmbula ànu menemene mu kaabujimà (bu muntu) mu byanza byà Nzambì, bwà mudimu wà Nzambì.

⁸⁸ Ne Yéyè ki cileejilu cyètù. Twètù tudi bantu balùme ne bantu bakàji. Tudi kàbidi beena Kilibò. Pìikalàbi ne Yéyè ncileejilu cyètù, tùdilàmbùlaayi twètù biinè mu byanza byà Nyumà Mwimpè, bwà twamòna mwà kwikala beena mu Bukalenge bwà Nzambì.

⁸⁹ Ûvwa muntu mu mu byònsò; Ûvwa Nzambì mu byònsò. Kàdi Wàkalekelela bitùpà Byèndè byà mubidi ku Èndè...ne bitùpà Byèndè byà mubidi, ne ngeelèlù Wendè Sungasunga wa meeji, ne ngenzèlù Wèndè sungasunga wa maalu, ne Èndè majinga Sungasunga, ne: “Ndi ngenza ànu cidi cìsànkishà Taatù.” Ki bwalu mbwòbù abu’s. Musùngidiibwe mu kaabujimà ku bantu. Baakwidi bàakalwa kùdiYe, bantu banène, kwambabò ne: “Laabi, *cikampànda*,” ne kuteetabò bwà kuMubweja mu diswikakana dyàbò ne màngumba àbò ku nkòsa-mishiku. Kàdi Yéyè ùvwa musùngidiibwe mu kaabujimà bwalu Ûvwa mweyèmène Nzambì.

⁹⁰ Mwimbi wa Misambu kaakambakù ne: “Wèwè neùMusùngilè, bwalu mMuNgeeyèmène ànu menemene” anyi? Nwamònu anyi? “Mèmè nènsungilè Munanga Wanyi ku mbwa, bwalu mMuNgeeyèmène.”

⁹¹ Dìbà kampànda patwikalà bafikè ku ndekeelu kwà lwendu, ndi muswè bwà biikalè nànu bwànyì mèmè. Ndi mumanyè ne udi muswè bwà biikalè nànu bwèbè wèwè. Ndi muswè bwà Àmbèku ne: “Nèmmusùngilè ku mbàngà yà lufù, bwalu mmuNgeeyèmène. Nèmmusùngilè ku lukitá, mu dìndà dyà dìbiishiibwa dyà ku lufù, mmusùngila mu kaabujimà, byònsò musùkà, mubidi, ne nyumà, bwalu mmuNgeeyèmène.”

⁹² Midimu yònsò yà Yesù yìvwa mijikija. Byònsò bìvwa bisùngidiibwe mu kaabujimà, mu byònsò. Wàkasùngila mwena nsudi mu kaabujimà ku nsudi. Wàkasùngila mu kaabujimà mukàji uvwa ne mashi àlwa munda awu, ku disaamà dyèndè dyà mashi adi. Wàkasùngila bàà pa buloba mu kaabujimà ku mpèkaatù, pàakafwàYe mu ditùkù dyà difuta dyà cibawu apu. Wàkasùngilangana mu kaabujimà ku mpèkaatù ne mpèkaatù yònsò. Wàkasùngila Èkèleeziyà. Pa nànu kabyèna bikèngela twikalè ne nsòmbelu wa mikòlò mu màyi kàdi tudyàbila nyòotà to, balùmyàna. Kabyèna bikèngela bwà

twikalè ne nsòmbelu wa bacimùnyìibwe nànsha, bwalu Yèyè wàkacimuna dyabùlù ne kukwàta mamfùmù ònsò ne makolè, ne mubìvwijè ku bukòntononyi mwinshì mwà makàsà Èndè, ne kabyèna ne bukenji bujaalàmè bwà kukukòòkesha to. Twètù tudi beena Kilistò, buujìibwe tètè ne Nyumà Mwímpè. Kabyèna bikèngela bwà tutùmè díy-. . .bwà dyabùlù àtùtumiè díyi to. Kilistò mmutùsùngìle, disùngidiibwa mu kaabujimà; mutùsùngìle ku bubì, mutùsùngìle ku mpèkaatù, mutùsùngìle ku biibidilu, mutùsùngìle ku kabwabwa, mutùsùngìle ku—ku dikùtakajangana, mutùsùngìle ku mìshindù yònsò yà bintu byà busenjì. Yèyè mmutùsùngìle mu byònsò ne mutùtèèke mu byanza Byèndè byà cijila; disùngidiibwa dyà menemene, mu kaabujimà.

⁹³ Mmutùsùngìle ku mabèèdi ètù. Mmutùsùngìle ku mabèèdi, bwalu tudi ne mukàndà wa bwena-cintu mulelèlè wà kawùyì dyelakù mpatà to. Àlèluuyàh! “Bwalu Wàkatàpiibwa mpùtà bwà kushipa kwètù kwà mikenji, ku mibùndàbùndà Yèndè twàkondopiibwa.” Yèyè m’Mwondopi wetù. Ki bwà cinyi mukàjì mukwàte ne byà luse, mukesè, wa dìsaamà dyà tunèkè awu, ùdìtácisha bwà kubèèja bàyèndè uvwa upùnga ne lufù ku kànsèrè, kubwelayè mu bipaapu abi mu Bwikadi bwà Nzambi. Úvwa ne diitabuujà. Ne yèyè. . .Bangàngàbukà bàvwa benzè byònsò bìvwàbo pààbò mwà kwenza abi, kàdi yèyè kulonda bulombodi bwà Nzambi ne kusùngidiibwayè mu kaabujimà.

⁹⁴ Bayiidi bàvwa ne disùngidiibwa mu kaabujimà, kakùyì mpatà to disùngidiibwa mu kaabujimà. Bwà cinyi? Bwalu bàvwa buujìibwe ànu menemene ne mu kaabujimà ne Nyumà Mwímpè. Paùdi wèwè, ànu cidimba cyà èkèleeziyà ne mulabùle mpaasàtà ku cyanza cyanààna, anyì kampànda. . .mwenzè kaadilabula kàà mushindù kampànda kàà ditùpika, dyela dyà mbilà, anyì dyakula dyà mu myakulu, anyì cintu cikwàbò kampànda; kàdi mucikàle ànu ne budimù mu mwoyi wèbè, byenedi byà kabìyi byùmvwika, wamba mashimi, unwà mfwankà, walakana bakàjì; kùdi cintu kampànda cidì kaciyi cyanjì kwenzeka to. Kùdi katanyì. “Bwalu ewu udi munangè maalu a pa buloba, anyì bintu byà pa buloba, dinanga dyà Nzambi kadyèna munda mwèndè to.” Udi mupàmbwìshìibwe. “Ku mamuma àbò nkunwàbàmanyinà.”

⁹⁵ Tudi bònsò baswè bwà kudyènza cimùkù, ne Nyumà Mwímpè. Bìvwa bìkèngela bwà cidimba cyònsò cidyènzè cimùkù, muntu ne mukwèndè. Dinanga dyà Nzambi ndipòngòlòdiibwe mu myoyi yètù, ku Nyumà Mwímpè. Yèyè ùdi ùtùkezula ku bubì bwònsò. Tudi basùngidiibwe ku bintu byà pa buloba. Yesù wàkamba ne: “Ku cyôci eci nkwàmanyinà bantu bònsò ne nudi bayiidi Bàànyì, panwikalà ne dinanga, muntu bwà mukwèndè,” pàdi cidimba kampànda cinanga cidimba cikwàbò mu mùshindù wà mufwànyine kufwà bwà cyôci aci.

⁹⁶ Pàdi cintu cibì cimwè cibanga, bantu bàà pambèlu, bàmwè bàà ku bakàji bàlwa bàmba ne: “Mpindyewu, tàngilà, munanga wanyì, bìvwakù mwà kwikala bìmpè bu wèwè mwenzè *cikampànda*, anyì kwenza *cikansanga*, muvwàle *cikankènga*, anyì mwenzè *cikansanga*, anyì mwenzè *cikankènga*, ne kuumukakù kùdi musùmbà wà bansantu babùnguluki bàà mu malaba abu,” anyì bikwàbò byà mùshindù awu, tudì badyènzè cimùkù bikolè ne Nzambì!

⁹⁷ Wèwè udi wamba ne: “Èè, Mwanèètù Branham, s’nditeeciibwa dibì be.” Kàdi Kilistò wàkafwà’s mmu kiipàcilà aku. Dyabùlù mmucimùnyìibwe. Tudì baswè disùngidiibwa mu kaabujimà. Tudì baswè èkèleeziyà udi mutòoke ne mukezùke ne kàyì musopakaja to, ne musukula mu Mashi a Mwànà wa mùkòòkò, ne mùle tètè ne Nyumà Mwìmpè, ne bimanyinu ne maalu a kukèma ne bishimà. [Katùpà kàà mukàbà wa mèyì munda mutupù—Muf.] . . . kusùngila muntu ne muntu mu kaabujimà. [Katùpà kàà mukàbà wa mèyì munda mutupù].

⁹⁸ Nzambì munanga, Wèwè kùtu wangata bintu pàdìbi kabiyi bisùngidiibwe mu kaabujimà to. Kùvwakù mwà kwakidila mulàmbù mwikàle ne kalèmà to. Kwènàku mufwànyine kwakidila disambila, diikàle ne mpèkaatù paanyimà mu nsòmbelu wa muntu awu nànsha. Kwènà ànu mufwànyine kudyàkidila to, Mukalenge. Kùtukù mucyènzè mu bikondo bishààle, ne Kwènàku mwà kucyènza leelù to. Kàdi mulàmbù wùdi ne cyà kwikala kawùyi kalèma. Mukalenge Nzambì, patùdi tudyàdija twètù biinè pa cyoshelu apa, nsòmbelu wa didilàmbula, umùshà kutùdi, Èyì Mukalenge, tulèmà twònsò twà mpèkaatù. Ndi ngaadija ànu menemene musùkà wànyì, ne mubidi wànyì, ne dikàndà dyànyì, diditàcisha dyànyì, pàmwè ne èkèleeziyà ewu mu dindà emu, pa cyoshelu. Tùkezùlèku ku Mashi Èbè, ne tùfwilèku luse ku mpèkaatù yònsò utùdi benzè. Ne swàku bwà Nyumà Mwìmpè wa butùmbi àsombelèku ne bubanji bwònsò munda mwètù, ne Bwikadi Bwèndè bùtùshindikijè patùumukà mu tabernacle emu mu dindà emu, bwà twàmanyakù munda mwètù ne Wàtùfwidi luse. Dìbà adi disambila nediikalè ne: “Tùfwilèku luse ku matomboka ètù mutùdi tufwila luse aba bàtù bàtwènzèlà matomboka.” Enzàku nànkù, Mukalenge.

⁹⁹ Ikàlàku pabwìpì neetù mpindyewu, tùbènèshèku ne tùlamèku too ne patwàsangilà cyàkàbìdi mu disangisha dyà dilòòlò. Swàku bwà twàbwela ne byanza bitòoke ne mwoyi mukezùke, biWikalàku kùyi mwà kubènga to, bwalu tudì baswè disùngidiibwa mu kaabujimà mu byònsò ku cintu kanà cyònsò, Mukalenge, cidì cifwànyine kutùpangisha bwà kwikala bukènkè bwà bàà pa buloba; mwèndù wùdi mutèeka pa kakùnà, kawùyi mubwikila mèèsà to, kàdi mwèndù wùdi mutèeka pa kakùnà, mwikàle wùfila bukènkè bwà kulombola makàsà a bantu mu njila udi mululàme. Enzàku nànkù, Taatù. Tudì tulòmba nùnkù mu Dìnà dyà Yesù, ne bwà butùmbi Bwèndè. Amen.

¹⁰⁰ Nêndombè Doc . . . Ngeela meeji ne ùdi paanyimà pààpa, anyi umwe wa ku balami udi kaaba aka. Bwà èkèleeziyà kubalayè cyôci eci, Doc, lwâ ùteekè eci ku mboodi wa mamanyisha eku bwà èkèleeziyà wàcimòna pàdìbo bènda bapàtuka apu. Ne pashiishe Mwanèètù Collins, yéyepù . . . Mwanèètù Collins ùdipù anyi? Mupèeshè cikwàbò eci.

¹⁰¹ Nènku, èyo, mukalenge, nènku netùmonè cidi . . . [Mwanèètù Branham ùdi ùbala kabèji kampànda—Muf.] Mmuntu udi ukèba muyiiki wà bàbìdi. Wòwò awu wùtu misangu yònsò ànu wùfidiibwa. Tudi ne disànka.

Nènku ndi ne miyiiki yà bàbìdi. Nudi numòna's, cintu cyùdi ne cyà kwenza nkubiikila ku nombà wetù kuntwaku. Tuvwa—tuvwa bapetè lutàtù lwàbùngi kumbèlu, aci èkèleeziyà mmucimanyè. Aba mbeenyi. Èkèleeziyà mmumanyè bwalu abu. Bivwa bikèngela bwà kwikalakù kabèji kakesè katèèka . . . Nènkàtèèkèshè kabìdi kaaba aka, mu èkèleeziyà emu, bwà bàdi bàlwa abu. Nudi numòna's, bàdikù bààbùngi be, mu mùshindù wà katùyi mwà kutàngila bwalu bwàbò bònsò to, ànu pàdìbo bàlwa bilondèshile nombà apu. Nwamònu anyi? Nènku tudi . . . Bu wèwè ànu mwà kubiiikila BUTler 2-1-5-1-9, BUTler. [Nombà wa tèlèfonè ewu ùkaadi mushintulula—Muf.] Ne yònsò wa ku bidimba udi umòna muntu kampànda muswè, mèmè ntu misangu yònsò ànu ne disànkà dyà kumòna bantu. Kàdi tudi ne ndongolwelu kampànda wa ciibidilu. Kùdi bàmwè bàkaadi bamanè kubiiikila, bààbùngi, nwamònu's. Kàdi tudi ànu tulwa's, ku umwè ku umwè, patùlwalwà apu. Pashiishe kùdi . . . Kale wàwa, tuvwa ne cintu cyenzè ànu bu cyà ku mpùùkàpùùkà nàнку, mùshindu kanà wònsò, tutùmpika, tuzùnzuka, bantu bààlukila mu mààbò batekète mu mabòkò, ne bikwàbò byònsò. Bwà mpindyewu bàkaadi ne bintu byònsò ànu mu bulongàmè. Nènku ki citùdi tuteeta kwamba mpindyewu, nwamònu's, kutèèka maalù ònsò mu bulongàmè, ànu mu bupwàngàne menemene.

Ne mèmè nèngiikalèku ne disànkà dyà kumòna kasumbù kàà bananga aba, bu bòbò ànu mwà kubiiikila BUTler 2-15-19 (1-5-1-9), ne Mukalenge Mercier anyi Mukalenge Goad, umwe wa kùdìbo, neàndamunè ku tèlèfonè ne neàkwàmbilè ànu menemene dìbà dinùdi mwà kupeta cipungidi. Tudi ne kaaba kuntu kwàka, mwikàle byamù bifidi byà citaleela, ne mulongolola bwà kwakidilamù bantu bwà kubàsambidila. Tudi ànu ne disànkà dyà kucyènza.

¹⁰² Mpindyewu, cìndi ncìyi mvwila mu èkèleeziyà, bantu bàdi bèèla meeji ne ndi nteeta bwà kwepuka bantu; kì nnàнку to. Ndi nditàcisha bwà—bwà kwikala ànu menemene mu bulongàmè. Nwamònu anyi? Ki cìndi muswè bwà kwikala, kabìyi ànu kwenza kànsungànsungà to. Muntu yònsò, nànsha nganyì, mwaba kanà wònsò, pa dìbà kanà dyònsò, nwamònu's; dikòbà, twitabààyi, kabyèna ne bwalu to. Tudi ànu tulwamù ne

tutwilangana ne bantu. Nènku bôbò ne dijinga kampànda, tudi tushààla ànu ne Nzambi too ne pàdici cipeta dyandamuna. Bôbò baswè kumanya cintu kanà cyônsò pa bìdì bitangilà masangisha, mu bushùwà bwa bwalu, tudi tutàngila bwalu bwàci ne tucitèeka pa mwaba. Aci cidì ànu mbulombodi bwà Nyumà Mwímpè. Ne cidì . . . Mùshindù awu, ndi ngeela meeji ne ngùdì mwímpè, cidì cyènza ne bantu bônso bìikalè ànu mwomùmwe. Pa nàнку, kakwèna byà kànsungànsungà abi to, nànsha kakesè.

¹⁰³ Kùvwakù bantu balwè bwà kubàsambidilabò, mu dindà emu, biikàlè bàsaama ne baswè bwà bàbàsambidilè anyi? Èyo. Kabèènakù to.

Nàнку twìmbààyi musambu mwímpè awu bwà . . . bwà dikuukwila. Citùdì mwà kwimba ncinyi mu dindà emu? “Ncinyi cidì mwà kuumusha mpèkaatù wànyi?” Udi muwùmanyè anyi, Teddy? “Ànu Mashi a Yesù.” Ncinyi cidì mwà . . .

[Mwanèètù wa bakàjì kampànda ùdi wàkula ne Mwanèètù Branham—Muf.] Èyo, mukalenge. Udi muswè kumusambidila mpindyewu anyi?

Ndi muswè kusambidila inàbànzà wàwa. Kutentekela mukàjì udi apa ewu byanza. Nàнку, swàyi nwinyikèku mitù yènu pàmwè naanyi mpindyewu, mu cimùmà.

¹⁰⁴ Nzambi munanga, kùdi inàbànzà udi usaama bikolè. Mwanèètù wa bakàjì awu mmuzànjike wèndè mubidi, nànsha mene bwà kuumusha kànsère kùdi bakwàbò, bwà kwimana pankaci, bwà bakwàbò. Kàdi Wèwè udi mumusungile ku cyôci aci, Mukalenge, kùkaadi ndambù wa matùkù, pàakamanyikà bintu abi. Àcijandùlèku, yèyè mwìnè, dîbà adi, Mukalenge, neàmanyè ne ncifùmìne Kùdì. Nyewù mmutentekela byanza, ne ndòmba luse bwà mukàjì mukwàbò udiyè mwimànyine awu. Swàku bwà ngàsà wa Nzambi, Bukolè bwà Nyumà Mwímpè . . . Kwòkù bubì kampànda mu myoyi yètù, Mukalenge, anjì túsokòlwèlèbu, dyàmbedi, dîbà adi, netùye kabùlongolola. Dîbà adi tudi tumanya ne tudi balengèlèèle Nzambi, tudi mu ditalala ne Nzambi, tudi tupeta bitùdì tulòmba abi, bwalu katwèna ne dipìlèlè nànsha dikesè to. Enzàku nàнку, Mukalenge. Mu Dîna dya Yesù mmùndi ndòmba emu. Amen.

Èyo.

Ncinyi cidì mwà kusukula ne kuumusha
mpèkaatù wanyi?

Ànu Mashi a Yesù;

Ncinyi cidì mwà kungaalujulula?

Ànu Mashi a Yesù.

Kaa, cyà mushinga mukolè ndukòkà alu

Lùdì lùmvwijà mutòoke bu nêjè;

Ncyèna mumanyè mukwàbò mpokolo to,

Ànu Mashi a Yesù.

¹⁰⁵ Mbanganyi bàdiku badyũmvwè ne mpèkaatù yàbò yònsò yidi mwinshì mwà Mashi? Tùwimbààyaakù ne byanza byètù byela muulu mpindyewu.

Ncinyi cidi mwà kusukula ne kuumusha
mpèkaatù wanyi?

Ànu Mashi a Yesù;

Ncinyi cidi mwà kungaalujulula?

Ànu Mashi a Yesù.

Mpindyewu patùdi tupwekesha byanza apa,
tùlabulangaàayi ku cyanza.

Cyà mushinga mukolè cidi . . .

Ncyà bushùwà, mu myaba yònsò.

. . . mutòòke bu nêjè;

Ncyèna mumanyè mukwàbò mpokolo to,

Ànu Mashi a Yesù.

Nudi baMunangè anyi? Amen.

Kaa, mùshindù mwinè wùndi munangè Yesù's
wè,

Kaa, mùshindù mwinè wùndi munangè Yesù's
wè,

Mpindyewu, shààlaayi naaci mpindyewu. Bantu bònsò
shààlaayi bakwàte Nzambì.

Mùshindù mwinè wùndi munangè Yesù's wè,
Mbwalu Yèyè wàkannanga kumpàlà.

Ncyàdyàkulekelakù . . .



DISÜNGIDIIBWA MU KAABUJIMÀ LUA59-0712

(A Total Deliverance)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyälumingu mu dindà, mu matùkù 12 a ngondo wa mwandamutekète, cidimu cyà 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org